

ASO LUA, 22 IANUARI 2019

Na tauaofia le Fono Aoaofa Faitulafono i le itula e 9:20 i le taeao.

Tatalo.

FOFOGA FETALAI: Ou te faasilasila atu ua toe amatalia nei Taulumaga a le Fono Aoaofa Faitulafono.

MALELEGA MAI LE AO O LE MALO

“TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa, ua ou tuuina atu nei le Maliega i le Fono Aoaofa Faitulafono na te iloiloaina ai le Tulafono Tau Faaofi ua faaaliga iinei:

1. Tulafono Tau Faaofi o Teuteuga o le Tulafono o le Fetufaaiga o Faamatalaga Tau Lafoga 2019.

TUUIINA ATU i lo'u nei Lima i lenei aso 18 o Ianuari 2019.

Tuimalealiifano Vaaletoa Sualauvi II
O LE AO O LE MALO.

FAAALIGA MAI LE TAITAI O LE MAOTA

E tusa ai ma Tulafono Tumau 76 a le Palemene, ua tuuina atu nei le Faaaliga i le Fono Aoaofa Faitulafono mo le iloiloaina o le Tulafono Tau Faaofi ua faaaliga iinei:

1. Tulafono Tau Faaofi o Fanua ma Suafa 2019.
2. Tulafono Tau Faaofi o Teuteuga o Tulafono o le Komisi o le Gagana Samoa 2019.
3. Tulafono Tau Faaofi o Tagata Solitulafono Toe Faafoi Mai 2019.

22 IANUARI 2019

Faaaliga mai le Taitai o le Maota

4. Tulafono Tau Faaofi o Teuteuga o le Tulafono o Taitai mo Faalavelave Tutupu Faafuasei 2019.

TUUINA ATU i leni aso 21 o Ianuari o le tausaga 2019.

Hon. TUILAEPA Dr Sailele Malielegaai.
TAITAI O LE MAOTA.

FAAALIGA MAI LE TAITAI O LE MAOTA

E tusa ai ma le Tulafono Tumau 100 (2) ua tuuina atu nei le faaaliga i le Fono Aoao Faitulafono mo le iloiloaina o Tulafono Tau Faaofi ua taua i lalo i lona tulaga faanatinati.

1. Tulafono Tau Faaofi Teuteuga o le Tulafono o le Matagaluega o le Soifua Maloaina 2019.
2. Tulafono Tau Faaofi o Teuteuga o le Tulafono o le Ofisa Autu o Mataupu Faaletulafono mo Tagata Lautele 2019.

TUUINA ATU i leni aso 21 Ianuari 2019.

Hon. TUILAEPA Dr Sailele Malielegaai.
TAITAI O LE MAOTA.

FAASILASILAGA A LE FOFOGA FETALAI

FOFOGA FETALAI: Avea ia leni avanoa ou te faatalofa atu ai ma le agaga faaaloalo i lau Afioga i le Palemia, faapea foi le Kapeneta aemaise sui usufono mamalu o le Palemene i le Fonotaga amata o leni tausaga. Ia, lafoai mea uma i le Atua ina ia faapena ona usufono mai Lona agaga fesoasoani e tautoaluaina i tatou e ala i tatou feau ma galuega aua se ai mo le tapuaiga a Samoa ina ia manu faaifo mai le lagi le aso aua galuega fai ma le tatou uluai fonu o leni tausaga.

22 IANUARI 2019

Faasilasilaga a le Fofoga Fetalai

Avea foi lenei avanoa e faatalofa atu ai i Ofisa Sili o Pulega ma Pule Sili o Matagaluega ma Faalapotopotoga a le Malo i le latou galuega faifaipea o le tautuaina o le Malo ma le atunuu e ala i lo latou foi valaauina aemaise o le faatasi mai pe a fonoa le Palemene.

O se upu faafeiloai i sui auai o le Polokalame Faa-Palemene Lona Tolu mo tagata lautele 2019. Mo le silafia e le Maota ua nofoia nei le Nofoga o tagata Lautele e sui auai o le Polokalame Faa-Palemene lona tolu lenei mo tagata lautele 2019. O lo o faaauau pea le faatautaiga o lenei faamoemoe taua o le Palemene e ala i Polokalame Faalauiloa o lo o taulamua ai le Ofisa o le Fono Aoaofaitulafono. O le fua tualuga o lenei taumafaiga o le faalauiloaina lea o le Palemene ma ona nafa ma matafaioi aemaise o ana galuega fai. E le gata i lea, a o le aoaoina o tagata lautele i tiute ma matafaioi i sui usufono faakomiti a sui usufono faapea foi Komiti Faa-Palemene e pei ona filifilia ai. O le uluai taimi lenei ua valaauina ai sui o le atunuu lautele e avea ma sui auai o lenei polokalame, o le faamoemoe ia silafia e le atunuu lautele faiga faa-palemene faatemokarasi, o faiga ia e tauala mai ai lo latou leo i o latou sui usufono na o latou filifilia mai mo le Palemene. E toe faamanatu atu le itu lea, o le faiga lea e silafia ai e o latou sui usufono na o latou filifilia mai mo le Palemene e avea ma leo o itumalo ma afioaga, ia o latou silafia e i ai le avanoa e faaleo ai lo latou sao i le fausiaina o Tulafono e tagofia e le Palemene i lea aso ma lea aso. O auala ia e malamalama ai tagata uma i Tulafono e pasia atu e le latou lava Palemene na o latou filifilia. O se vaega o le latou polokalame i le taeao nei, lea ua faatasi mai ai e molimauina taualumaga uma o le faagasologa o galuega a le Palemene e ala i lana fonotaga i lenei aso. E avea ai le leo o le nofoa e fai ma sui o le Palemene e faatalofa ma faafeiloai atu ai i le agaga faaaloalo i lenei taeao.

O le tatalo a le Palemene ia agalelei le Atua i taualumaga uma o le a outou feagai ai e tusa ai o la outou polokalame i lenei aso.

SAUNOAGA O LE MALIU

FOFOGA FETALAI: Ua malama i ulugalua ma ua le o toe po foi se lilo i le faafofoga a le Ao Mamalu O Le Malo, le Sui o le Fono a Sui Tofia, faapea le Taitai o le Maota ma le mamalu o le Palemene ae a se faafofogaaga a Samoa i lona aoatetele i le tuumalo o le Afioga PAU SEFO TAUMATA PAU i le aso 19 Ianuari 2019.

O le Afioga PAU SEFO TAUMATA PAU ua tele tausaga o tauva i le faiga palota mo le Nofoa o lona itumalo Faaalaalafaga o Faasaleleaga Nu.2. E faamanava e le Atua ana galuega o lo o ia nofoia le nofoa o le Itumalo Faaalaalafaga o Faasaleleaga Nu.2 talu ona filifilia mai le faiga palota aoao mo le Paeaiaga lenei Lona XVI mo le tausaga 2016 seia oo atu i le 2021.

Sa avea o ia ma sui usufono o le Komiti o Tulafono Tumau, Mataupu tau Faiga Palota, Talosaga ma Tofiga Faale-Faavae i le Paeaiaga o lo o faagasolo nei.

22 IANUARI 2019

Tuuina atu o Pepa

O le Afioga PAU SEFO TAUMATA PAU o le sui auai o le Vaega Faaupufai e Puipuia Aia Tatau a Tagata po o le HRPP. O lena foi ua tuuina atu i luga o le Laulau o le Nofoa o le itumalo o Faasaleleaga Nu.2 le Nofoa sa nofoia e le Afioga i le sui usufono mamalu, le teufugalaau e fai ma faailoga o le avanoa o le Nofoa o le itumalo ona ua tuumalo ma valaauina e le Atua le sa avea ma ona sui usufono i le Palemene a o feagai ai ma le toe usuia o le Fonotaga lenei a le Palemene i le amataga o lenei tausaga.

Avea ia lou leo e fai ma sui o le Palemene e momoli atu ai le faamaisega ma le faamafanafanaga i le faletua, o le nofo a alo ma le aiga aemaise o le itumalo pele ona o le toesea o le Afioga i le sui usufono mamalu ma le tatou uso, le Afioga ia PAU SEFO TAUMATA PAU.

Ou te talosagaina ai ma le agaga faaaloalo le mamalu o le tatou Maota, ina ia tatou tutulai faatasi ma au i se minute se tasi e faailoa ai lo tatou faaaloalo i lo tatou uso a sui usufono ua tuumalo.

Na tutulai le Maota e faaalua lo latou agaga faaaloalo i le sui usufono ua tuumalo mo se minute se tasi.

TUUINA ATU O PEPA

Na tolaulau e le Failautusi Pepa ua tuuina atu e tusa ai ma le Tulafono Tumau 49(2).

1. P.P.2018/2019 Nu.102, Lipoti Faaletausaga a le Faalapotopotoga Faavae Tau Fatuga'o a Samoa mo le Tausaga Faaletupe na faaiuina 30 Iuni 2018.
2. P.P.2018/2019 Nu.103, Lipoti Faaletausaga a le Pulega o Tupe Faava o Malo a Samoa (SIFA) Lomiga 13, 2018.
3. P.P.2018/2019 Nu.104, Lipoti Faaletausaga a le Faalapotopotoga o Esetete Tausi a Samoa mo le Tausaga Faaletupe na faaiuina i le Aso 30 Iuni 2017.
4. P.P.2018/2019 Nu.105, Lipoti Faaletausaga a le Matagaluega o le Soifua Maloloina mo le Tausaga Faaletupe na faaiuina i le aso 30 Iuni 2017.
5. P.P.2018/2019 Nu.106, Lipoti Faaletausaga a le Ofisa o le Komesina o Faiga Palota mo le Tausaga Faaletupe na faaiuina aso 30 Iuni 2018.
6. P.P.2018/2019 Nu.107, Lipoti Faaletausaga a le Matagaluega o Galuega, Felauaiga ma Atinae Eseeese mo le Tausaga Faaletupe na faaiuina aso 30 Iuni 2018.
7. P.P.2018/2019 Nu.108, Lipoti Faaletausaga a le Faaputuga-Tupe mo le Lumanai Manuia o Tagata Samoa 2018.
8. P.P.2018/2019 Nu.109, Lipoti Faaletausaga o le Penisione a le Palemene 2018.
9. P.P.2018/2019 Nu.110, Lipoti Faaletausaga a le Faaputuga-Tupe o Faamanuiaga Mo Tagatanuu Matutua o Samoa mo le Tausaga Faaletupe na faaiuina i le aso 30 Iuni 2018.

22 IANUARI 2019

Tuuina atu o Lipoti a Komiti Filifilia

10. P.P.2018/2019 Nu.117, Lipoti Faaletausaga a le Matagaluega o Punaoa Faalenatura ma le Siosiomaga mo le Tausaga Faaletupe na faaiuina i le aso 30 Iuni 2018.
11. P.P.2018/2019 Nu.118, Lipoti Faaletausaga a le Matagaluega mo Tupe Maua mo le Tausaga Faaletupe na faaiuina i le aso 30 Iuni 2018.
12. P.P.2018/2019 Nu.119, Lipoti Faaletausaga a le Kamupani o Pulega o Faaputugatupe Teufaafaigaluega o Mavaega Tausi a Samoa mo le tausaga Faaletupe na faaiuina aso 30 Iuni 2018.

TUUINA ATU O LIPOTI A KOMITI FAA-PALEMENE

Na tolaulau e le Failautusi Lipoti a Komiti Faapalemene e tusa ai ma le Tulafono Tumau 52(5).

1. P.P.2018/2019 Nu.111, Lipoti a le Komiti o Tupe Maua ma Tupe Totogi i le P.P.2018/2019 Nu.94, Tala Faatatau Faaopoopo Muamua o Tupe 2018/2019.
2. P.P.2018/2019 Nu.112, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le Tulafono Tau Faaofi o Faiga Palota 2018.
3. P.P.2018/2019 Nu.113, Lipoti a le Komiti o Tulafono Tumau, Mataupu tau Faiga Palota, Talosaga ma Tofiga Faale-Faavae i le Tulafono Tau Faaofi o le Komisi o Faiga Palota 2018.
4. P.P.2018/2019 Nu.114, Lipoti a le Komiti o Tulafono Tumau, Mataupu tau Faiga Palota, Talosaga ma Tofiga Faale-Faavae i le P.P.2018/2019 Nu.36, Lipoti a le Komisi o le Toefuataiga o Tulafono a Samoa i le Tulafono o Nakoti 1967 (Iloiloga o Fualaau Faasaina).
5. P.P.2018/2019 Nu.115, Lipoti a le Komiti o Tulafono Tumau, Mataupu tau Faiga Palota, Talosaga ma Tofiga Faale-Faavae i le P.P.2018/2019 Nu.62, Lipoti Faaletausaga a le Ofisa o le Tausi Mavaega a le Malo mo le tausaga 2016/2017.
6. P.P.2018/2019 Nu.116, Lipoti a le Komiti o Tulafono Tumau, Mataupu tau Faiga Palota, Talosaga ma Tofiga Faale-Faavae i le P.P.2018/2019 Nu.63, Lipoti Faaletausaga a le Ofisa o le Komesina o Sulufaiga mo le Tausaga Faaletupe 2016/2017.

LAFO A LE KOMISI FAA-PALEMENE

FOFOGA FETALAI: Tulai mai lau Afioga i le Sui Taitaifono o le Komisi lau Afioga i le Sui Fofoga Fetalai.

22 IANUARI 2019

Lafo a le Komisi Faa-Palemene

Tofa NAFOITOA TALAIMANU KETI (Sui Taitaifono Komiti o Tulafono Tumau, Mataupu tau Faiga Palota, Talosaga ma Tofiga Faale-Faavae): Lau Afioga i le Fofoga Fetalai, talu ai ona o le uluai Fonousu lenei a le Palemene 2019, ua manatu ai le sui usufono mo Gagaemauga Nu.3 e le alulua, e ao ona matou afe atu aua le maualuga o le Maota lea ua malutauee ma ua malumaunu ai le fogatia ma ua matalupe ai foi le seuga i lenei taeao, ae fai ai foi ma lape o lauga. Ona ou faapea lea lau Afioga i le Fofoga Fetalai, matou te ofo alofa ma faatalofa atu i lau Afioga, malo le soifua, malo foi le tauatai i tiute e le faigofie, o lea ua e sii le faafetai ma le faamanu ma lo tatou sao ia manuvao i lenei taeao, tatou auai i lena. E ui lava ina ufitia lo tatou Malo ma le Maota i ao pogisa ona o lana valaau paia i se tasi o sui usufono mamalu o le Maota, ae le faia so tatou loto, o lana pule faitoatasi lea. Afe atu i lena Itu o le Maota, matou te ofo alofa ma faatalofa atu i lau Afioga i le Palemia, malo le onosai, malo tau, malo galue i lena tausaga ua mavae. Ia faamanuia le Atua i lau Afioga.

Lau Afioga i le Sui Palemia ma le Aiga Kapeneta, matou te faatalofa ma faafeiloai atu i lenei tausaga, malo le galulue, malo le tauatai. E faapea foi a outou Afioga i Sui Minisita o le Maota, malo le galulue, malo tautua, ua manuia faiva o lena tausaga o le Malo ona o la outou galuega faifaatasi.

Afe mai i lenei itu o le Maota, matou te faafeiloai atu i Taitaifono o Komiti Faa-palemene faapea foi sui usufono mamalu uma o le Palemene, e ofo alofa ma faatalofa, malo le tauatai, malo le onosai, malo mo galuega fai. E faatalofa atu foi i Ofisa Sili ma Pulega o Matagaluega ma Faalapotopotoga Tumaoti a le Malo, malo le onosai, malo le tau, malo le galulue, e silafia e le Atua mea uma i lo outou punouai.

Afe sa matou faamatalaga e pei ona faatalofa i le Taitai o le Maota, le Nofoa i lenei taeao i a outou Afioga, Sui o le Malo, e faapea foi Sui o Tina ma Tamaitai ua mafai ona tatou auai, ua fiasia le agaga, ua fiasia le loto, malo galulue, tatou galulue faatasi e manuia ai le tatou Faigamalo. Malo le auai i le Fonotaga i lenei taeao.

E le mafai ona galo Afia i le vao. E faatalofa i le tapuaiga a Lana Afioga Mamalu O Le Ao O Le Malo, le Sui o le Fono a Sui Tofia, le paia maualuga o le atunuu i Tama ma Aiga, o Aiga ma a latou Tama, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti. Malo le tapuai, malo le tatalo, o lea e sologa manuia ai le see o le sa o le Malo. Viia le Atua i mea uma.

Ae faapito augafa sa matou faatalofa i lo matou itumalo pele o Gagaemauga Nu.3, malo tatalo mai, e lagona i Tiafau tauave la outou tatalo, ua manuia faiva o la outou sui usufono ona o la outou tapuaiga. Ia alo maia, o lea o le a tuu i tai le vaa o Matautu aua lenei tausaga ma ana Faigamalo ma ona upufai.

Lau Afioga i le Fofoga Fetalai, ua ou tulai atu ma le faaaloalo e faatu le lafo, *Ina ia faamaonia e lenei Fono Aoao le Polokalame o Fonotaga mo le Tauaofiaga o le 2019/2020 ua tuuina atu iinei e pei ona faamaonia e le Komisi Faa-Palemene.*

22 IANUARI 2019

Tuuina atu o Talosaga

<i>Masina</i>	<i>Aso</i>	<i>Masina</i>	<i>Aso</i>	<i>Masina</i>	<i>Aso</i>
<i>Ianuari</i>	22	<i>Iuni</i>	18	<i>Tesema</i>	17
<i>Mati</i>	19	<i>Oketopa</i>	8	<i>Ianuari</i>	21
<i>Me</i>	28				

O le faaaliga lea ma le faaaloalo i lau Afioga. Faafetai.

Faaluaaina e le sui usufono mo Palauli le Falefa.

Na faamaonia le lafo ma faamaonia ai le Polokalame o Fonotaga a le Palemene 2019/2020.

TUUINA ATU O TALOSAGA

1. Talosaga Faamaualalo a Alii ma Faipule o Saleaula.

FOFOGA FETALAI: E tusa ai ma le Tulafono Tumau 57(2), o le a faapitoa se faamatalaga puupuu a le Sui Usufono e tuuina mai le Talosaga. Ia saunoa i mataupu patino ua taua e faapea:

- (1) vaega o tagata e sau ai le talosaga;
- (2) aofai o e o lo o saina o latou suafa;
- (3) uiga moni o mea o lo o aofia i totonu;
- (4) faitauina mai o le manao o le Talosaga.

Ou te tapa ma le faaaloalo lau Afioga i le sui usufono mo Alataua Sisifo e tulai mai.

Afioga ALIIMALEMANU ALOFA TUUAU (Alataua Sisifo): Lau Afioga i le Fofoga Fetalai, o se taeao manuia lenei taeao i le faamaoni o folafolaga a lo tatou Atua, e fou lona alofa i taeao taitasi ma aso uma. Ua maea la ona e fai le pou aua lo tatou Matai, o o tatou loto uma ia, aua ua tatou molimau pea i vavega o lona alofa tunoa i lau Afioga ma sui usufono mamalu o lenei Maota, e ui ina o lo o i ai le valaau paia i se tasi o sui usufono mamalu o le Maota, ae le gata i lea o Samoa o faafogafoga tapuai mai, aemaise o Lana puipuiga ia Samoa, pe a tomanatu i puapuaga o lo o fetai ai ma le tele o atunuu o le lalolagi.

A ua ou tulai atu ma le ava lau Afioga i le Fofoga Fetalai, ou te tuuina atu le Talosaga Faamaualalo a Alii ma Faipule o Saleaula e tetea atu ai i le Tulafono Tau Faaofi o Itumalo Palota 2018, ma o lo o sainia e matai e toa 10 o le afioaga. O le manao o lea Talosaga;

22 IANUARI 2019

Tuuina atu o Talosaga

1. "Ina ia faatumauina le Itumalo Faa-aalafaga o Gagaemauga Nu.2 o se Itumalo Palota i le Tulafono Tau Faaofi o Itumalo Palota 2018, po o le
2. Taatia le Tulafono Tau Faaofi o Itumalo Palota mo le Palota Lautele 2016 ae mataitu le lola palota mo le Faiga Palota Lautele 2021 e faamautu ai tagata palota e tusa o le faiga e palota tagata i le itumalo palota e alaala ai, mo le faamautinoaina o itumalo palota 2026.

E manino ma malamalama le autu o lenei talosaga ua tuuina mai ua faaoga ai avanoa taua o lo o i Tulafono Tumau a le tatou Palemene e tagofia ma faagasolo ai talosaga faapenei i finagalo o tagata lautele o si o tatou atunuu.

Lau Afioga i le Fofoga Fetalai ma lenei Maota, o le talosaga lena a Alii ma Faipule o Saleaula ua tuuina atu ma lou faaaloalo.

Lau Afioga i le Fofoga Fetalai, e tusa ai ma le Tulafono Tumau 57(3) ou te faatu le lafo, *Ina ia faitauina le Talosaga.*

Manuia le tatou Fono.

Faaluaina e le sui usufono mo Salega Sasae ma le sui usufono mo Vaisigano Nu.2.

Na faamaonia le lafo.

Na tolaulauina e le Failautusi le Talosaga.

ōI LE FONO AOA O FAITULAFONO A SAMOA

O le Talosaga Faamaulalo a Alii ma Faipule o Saleaula.

UA FAAALIA AI:

1. O le Tulafono Tau Faaofi o Itumalo Palota 2018 ua faasee atu nei e le Fono Aoa o Faitulafono i le Komiti o Tulafono Tumau, Faiga Palota, Talosaga ma Ofisa Faale-Faavae e iloiloaina, ua vavaeina ai le Itumalo Faaalaalafaga o Gagaemauga Nu.2 e aafia ai Saleaula ma Salamumu.
2. O nuu o Saleaula ma Salamumu e tasi lava le nuu faaleaganuu, ma e latalata sootaga ona o Aiga ae faapea foi faalupega o pitonuu po o aufono o Vaituutuu, Salapulou, Faletolu ma Leano e ui ina o Salamumu e i Upolu ae o Saleaula e i Savaii.
3. O Saleaula ma Salamumu o se tasi o Pule. Ae o le vavaeina o Saleaula ma Salamumu e i ai aafiaga ogaoga mo tagata ma tupulaga o Saleaula ma Salamumu, faatusa i le leai o ni aafiaga pe a suia le Itumalo Faaalaalafaga o Gagaemauga Nu.2 o se Itumalo Palota.
4. E i ai Itumalo Faaalaalafaga o lo o faatumauina o ni Itumalo Palota i le Tulafono Tau Faaofi o Itumalo Palota 2018, peitai e toaitiiti o latou tagata palota i lo o tagata palota o le Itumalo Faaalaalafaga o Gagaemauga Nu.

22 IANUARI 2019

Tuuina atu o Talosaga

5. O le Tulafono Tau Faaofi o Faiga Palota 2018 ua faasee atu foi e le Fono Aoaofa Faitulafono i le Komiti o Tulafono Tumau, Faiga Palota, Talosaga ma Ofisa Faale-Faavae mo le iloiloaina, ua faatulaga ai le palota o so o se tagata i le Itumalo Palota e alaala ai, vagana ai matai.
6. E le o mafai e le lola palota o lo o i ai nei ona maua ai se numera sao o tagata palota mo Itumalo Palota e tusa o le faatulagaga e palota i le Itumalo Palota o alaala ai. O lenei tulaga, e faatoa mafai ona mautinoa ina ua tapunia le lola mo le Faiga Palota Lautele 2021.
7. Afai ai o le numera o palota e fua i ai se Itumalo Palota, e tataua lava ona faamautu muamua le numera o tagata palota o se Itumalo Palota, e tusa o le faatulagaga e palota le tagata i le Itumalo Palota o alaala ai e pei ona aiaia i le Tulafono Tau Faaofi o Palota 2018.
8. O le mea lea ua faatoga atu ai Alii ma Faipule o Saleaula:
 - (1) Ina ia faatumauina le Itumalo Faaalaalafaga o Gagaemauga Nu.2 o se Itumalo Palota i le Tulafono Tau Faaofi o Itumalo Palota 2018, po o le isi fetuunaiga.
 - (2) Taatia le Tulafono Tau o Itumalo Palota mo le Palota Lautele 2026, ae mataitu le lola palota mo le Faiga Palota Lautele 2021, e faamautu ai tagata palota e tusa o le faiga e palota tagata i le itumalo palota e alaala ai, mo le faamautinoaina o itumalo palota mo le 2026ö.

ALII MA FAIPULE O SALEAULA**Sui o le Aufono o Faletolu**Levaopolo Esekia (*Saleaula*)Alofipo Peteli (*Saleaula*)**Sui o le Aufono o Salapulou**Faasootauloa Malosi (*Saleaula*)Laufou Faamanu (*Saleaula*)**Sui o le Aufono o Leano**Ua Mulivai (*Saleaula*)Matuavao Galuega
(*Saleaula*)**Sui o le Aufono o Vaituutuu**Aufai Tuaniu (*Saleaula*)Vaaaaoa Asuelu (*Saleaula*)Semau Iafeta (*Saleaula*)Fepuleai Attila M. Ropati
(*Vaitele*)

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafoaiga i luga o le faitauga faalua**

FOFOGA FETALAI: Malo faafetai. E tusa ai ma Tulafono Tumau 57(4), ou te faatonuina ina ia faataatia le talosaga i luma o le laulau a fono, ma ua tulai mai nei le talosaga e tuuina atu i le Komiti o Tulafono Tumau, Mataupu tau Faigapalota, Talosaga ma Tofiga Faale-Faavae, mo le iloiloina ma toe lipoti mai i le Fono Aoao.

**TULAFONO TAU FAAOFI O LE FAATATAUINA O TUPE
FAAOPOOPO (NU.1) 2018/2019 - felafolafoaiga i luga o le faitauga
faalua.**

FOFOGA FETALAI: E tusa ai ma Tulafono Tumau, o le a faagasolo nei loa felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2018/2019.

O le avanoa foi lenei o sui usufono e saunoa ai i tulaga tau tupe. Manatua o le tulaga tau tupe ma le tamaoiga o Samoa faapea faiga faavae tau tupe a le Malo e aga i ai saunoaga. Ou te faamanatu foi i sui usufono uma, e le tautalagia i le taimi nei mea taitasi ma le umi ai o a tatou fonotaga. O le Tulafono e faatoa saunoa i mea taitasi i le Tulafono Tau Faaofi i le taimi o le Iloiloga auilili pe a maea felafolafoaiga i luga o le faitauga faalua.

O le avanoa lenei mo sui usufono, e tomua i le tatou Tala Faaopoopo muamua.

Tulai mai le sui usufono mo Vaimauga i Sasae.

Afioga SULAMANAIA FETAIAI TAUILILI TUIVASA (Vaimauga i Sasae): Faafetai mo le avanoa i lau Afioga i le Fofoga Fetalai. Ao le i faia foi se sao o lenei itumalo o Vaimauga i Sasae, e tusa ai ma le Tala Faaopoopo ua opea nei i le laulau a fono, e muamua ona matou ofo alofa atu, faatalofa atu lenei itumalo i lena talaga atoa. Afio lau afioga i le Palemia, faapea foi le afio i le afioga i le Sui Palemia, tainane le paia o afioga i alii ma tamaitai Minisita o le Kapeneta, faapea le afio o Minisita Lagolago. Liliu mai foi i lenei talaga atoa o lea e afio atu afioga i Taitaifono a Komiti faa-palemene, ae a le afio o sui usufono o le Palemene o e na tofofi mai e le Atua e ala i filifiliga a le atunuu aua le faasoasoina o le tamaoiga ma le manuia o Samoa ma ona tagata. Faatalofa foi i le afioga i le Fofoga Fetalai, aemaise le afioga i le Sui Fofoga Fetalai, faamalo le tautua i lenei faigamalo o lo o taitaiina si o tatou atunuu, o lea ua tatou aulia ma amatalia foi lenei tausaga, e leai lava se mea o afea ma faapoia ai foi lo tatou atunuu, o lo o manuia le taitaiina e ala i le faatasi mai o le Agaga o le Atua. E le mafai foi ona alulua le lauga a Vaimauga i Sasae, ae o lo o i ai le tapuaiga mamalu a le afioga i le Ao Mamalu O Le Malo, lau afioga i le Tuiaana Tuimalealiifano faapea lau afioga i le Masiofo. Le tapuaiga a le aufaigaluega Paia a le Atua i soo se fatafaitaulaga. O outou o lo o nonomanu e ala i le tatalo tootutuli ma anapopogi aua se manuia o Samoa ma ona tagata.

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

Ae faapitoa sau faatalofa i si ou itumalo pele o Vaimauga Sasae, faamalo tatalo faamalo le tapuai, o lo o manuia ma malosi la outou sui usufono ona e lagona o lo o tapuaia faiva alofilima o sui usufono, faamalo tatalo, faamalo le tauatai aua le tautuaina o si o tatou itumalo. Faatalofa foi i lenei Maota, Ofisa Sili o Pulega a le Malo Faalapotopotoga Tumaoti ma Pisinisi, o outou lea e tua ma vae atu i ai le Faigamalo. O se taeao fou foi lenei taeao ua tatou auai ma le paia ma mamalu o le atunuu o lo o molimauina o tatou faiva alofilima, faafetai ua outou omai ma afifio mai, sei outou molimauina po o a mea a sui usufono ia e fai i totonu o le Maota, aua e seasea foi outou faalogologo i Fonotaga a le atunuu. Ae faafetai ua outou omai ma tapuaia foi, e atili ai ona totoa sui usufono pe a vaai atu i tua o outou afifio mai ma tui mai le mulipapaga o le tapuaiga.

Ou te faafetai i le afioga i le Minisita o Tupe e ala i lenei Tala Faatatau o le Tupe, ou te faafetai ona o le fuafua o le tamaoiga o si o tatou atunuu, o le tatou atunuu o le atunuu e faamanuiaina e le Atua. E leai ni ona tamaoiga e pei o suauu ma mea e maua ai a tatou tupe maua. O lo o tatou tagi lava i o tatou lima i mea o lo o faamanuia i ai le Atua i o tatou eleele. Ae faafetai ua tali tatalo a le aufaigaluega a le Malo, e ala i nai faamanuiaga. Faafetai atu ai i lau afioga i le Minisita ma le Minisita Lagolago. E avea foi lenei itula e faafetai atu ai i le tulai mai o le Ofisa Sili o le Matagaluega o Tupe, faafetai i lou tulai mai, o ou mama na, vaai foi ma le fiafia foi o le agaga e talavou lou soifua aemaise foi o lau Matagaluega, o ituaiga tagata ia o lo o manaomia e le Faigamalo ma le atunuu. E lima mama ma vae mama e tua i ai le atunuu. Ia manuia ou faivaalofilima, e te lagolagosua i le afioga i le Minisita.

Ae o le Tala Faatatau po o le Tala Faaopoopo o le tupe, ou te faaigoaina e lou sui usufono o le fetaiaga nai le Tapuania. Mafua i se a? fai mai e fiafia isi ae faanoanoa isi, e faanoanoa e a? E fiafia ua siitia ma alalalaga le atunuu ua maua ni tamaoiga po o ni faaopoopoga i sene ia latou tupe maua, ae faanoanoa ua le aafia uma le atunuu ona ua fai na o se vaega, faafetai ua amanaia le level lea e i lalo. Ae ou te faafetai, o le tele ia o manatu e fia talanoa i ai le sui usufono ae o lea faatoa ou vaai atu i le lipoti lea a le Komiti o Tupe, lea faatoa aumai nei i le taeao. O lea ua maua ai nisi o ou manatu sa ou fia talanoa ai, ae ua tuai na aumai. Ua tali ai nisi manatu sa ou faasea ai. O lou manatu i lau afioga i le Minisita o Tupe, o le tulaga i le siitia o totogi, malamalama lelei le sui usufono lenei ua leva ona i ai i lo tatou atunuu i le service a le Malo. O lenei ua tali tatalo a le atunuu, e ala i se faaopoopoga o tupe maua pe ua silia ma le luasefulu tausaga e leai lava, o lea e galulue lava le atunuu. Ae o le agaga lea ua aumai e lou sui usufono, e pei e tau lilifa ai lou manatu o lea ua sau i le supplementary e pei e foliga mai ua tatou iloa lelei lava, o le tala faaopoopo po o ni mea unforeseen e le i oo i ai le malosi. O le mea faatoa tutupu faafuasei ona faatino ai loa lea, aumai i totonu le mea e le i oo i ai le malosi, ae o lea ua aumai ai i totonu le siitaga.

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

Ou te le malamalama la po o le mea sa pau pe le i lilifa le silasila i ai, e pei se mea faatoa tupu loa. Ai ona ua fou le tulai mai o le Pule Sili fou lea tuu loa i totonu, ae e manatu sa tatau ona sau i le Tala Autu o le Tupe. Po o le a lava le aumaiga i totonu, faapea i le tulaga lea, ao le agaga fiafia i lou sui usufono e pei ona ou fai atu ua fiafia le atunuu ua tali a latou tatalo. O le uiga o lau faamatalaga ma lau tatalo lau afioga i le Minisita, se i silasila ane i le tulaga lea ua mafai ai ona tuu isi vaega, aemaise lava le level lea CEO i le isi tausaga fou. O le popolega o lou sui usufono, tatou te le faiaso ma le finagalo o le Atua, o nisi o CEO e le aulia lea tausaga fou e uma a latou konekarate i leni tausaga, ae o lea e fai mai faatoa effective i le tausaga e 2020. E le gata foi i CEO, ao le tulaga foi i sui usufono, ou te talanoa lava au ona o lea e fai mai o le level lea o sui usufono ma le level lea o CEO, o i latou lea o lo o tua i ai o tatou aiga ma nuu ma itumalo, pe \$1 lava, ae o lea e fai mai e tuu i le tausaga fou, ae o lau vaai o lea e lava le faasoa a lau afioga. Se i silasila ane i lena vaega, pe le faalavea ane ai ma leni tausaga i nai CEO ma nai sui usufono.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui: Lau Afioa i le Fofoga Fetalai.....

FOFOGA FETALAI: Malie le sui usufono o lo o saunoa se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui: Ua silia i le lua vaiaso o tuuina atu le Tala i le Tupe e tou te silasila i ai. E tasi lea sui usufono ua ova ma le lua vaiaso e lei faitauina le Tala i le Tupe ma malamalama lelei i ai. E masalo ana malamalama lelei i ai e na te le saunoa faapea. Tatou te le o talanoa i le 2020, o lea tatou te talanoa i le tausaga leni, lea e amata atu ai ona faagasolo faamanuiaga ia. E le faatasi foi pe faalua ona faasilasila e le Malo, o le faatulagaga o totogi o lea ua taoto atu i le Salary Tribunal.

O lea tatou te talanoa i le tausaga leni, lea e amata atu ai ona faagasolo faamanuiaga ia. E le faatasi foi pe faalua ona faasilasila e le Malo, o le faatulagaga o mea ia o totogi, o lea ua taoto atu i le Tribunal, Salary Tribunal, na faatuina i le tausaga 2001-2006. E le fou la i le Maota leni, e le tatau foi ona fou i le sui usufono o lo o saunoa nei, e le mafai ona laa le Malo seiloga e aumai le fautuaga a i latou ia ua tuutasi i ai le faiva o Pili, o latou ia ua faatamaoigaina i le tomai latou te faatulaga ai totogi o le aufaigaluega uma a le Malo, a ia vasaga lelei ma i latou foi o pisinisi i tua ina ia aua ne i fesiliai, aua o i ina e tutupu ai faalavelave. Ua tatou foi mai i faalavelave ia e tutupu i le soona faataatia o totogi e aunoa ma le tulaga o le silasila i le vasaga o totogi i le va o professions lea na iu lava ina alu ai savaliga tetee. O lea la ua taoto nei a tatou faiga faavae mo le vaega lea latou te sailiili ma aumai ai le latou Lipoti.

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

O lea ou te tau manatua nei po o le masina o Novema na taoto mai ai le latou Lipoti, e latou te mataitu lelei le vasaga o totogi o vaega eseese o le Malo ma i latou i tua i le private sector, latou o lo o galulue i tua atu o le Malo, latou ia tatou te matua faaeteete i ai, aua le avatua le soona manao, aua e le avea le soona manao, aua pe fia lava le siitaga e fai e le uma lava le manao. Pe miliona tala le totogi e le uma lava le manao. A o le mea e puipui i ai lau Afioga i le Fofoga Fetalai, ia aua ne i aafia se vaega o le atinae o le atunuu i le televave atu o le Malo ae faaletonu ai ma atinae a i latou i tua. O le mea lena e faaeteete i ai le Malo, leaga o i latou ia e i tua, e tele atu lo latou sao i le faatupulaia o galuega mo fanau a Samoa. Lau Afioga i le Fofoga Fetalai, manatua ane le mea lena, ua ova ma le lua vaiaso o tuu atu e le Malo le Tala Autu o le Tupe, faapea foi ma le lauga a le Minisita o Tupe e silasila totoa i ai ma matau, ma le matou tutulai soo atu ma faamalamalama.

FOFOGA FETALAI: Ia, o lena ua faamanino nisi o mea o lo o tau aafia mai i le saunoaga a le sui usufono mamalu. Tulai mai le sui usufono mo Vaimauga Sasae.

Afioga SULAMANAIA FETAIAI TAUILILI TUIVASA: Lau Afioga i le Fofoga Fetalai, o le finagalo lava lea o le Afioga i le Palemia, a o le lauga lava ia a Vaimauga Sasae e...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e le o se finagalo o le Palemia, o faiga faavae a le tatou Malo ma le Vaega Faaupufai a le HRPP lea e fai ma faamalamalama ma faamatala atu.

FOFOGA FETALAI: Malo, ia o faiga faavae a le Malo ma le HRPP le sui usufono. Ia se i tulai mai e faaauau le saunoaga.

Afioga SULAMANAIA FETAIAI TAUILILI TUIVASA: Ia, o le a see ese lo matou manatu i siitaga aua o atunuu i fafo ma le latou silasila i mea nei o sui usufono, e pei e i luga lava le level e tuu i ai mea o totogi, o sui usufono i atunuu la e i fafo ona e moni lava fai mai e faapena se....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e sese foi lea mau. E sese foi lea mau e agai i ai le sui usufono. Na ona ou faapena atu.

FOFOGA FETALAI: Ia se i tulai mai le sui usufono mo Vaimauga Sasae.

Afioga SULAMANAIA FETAIAI TAUILILI TUIVASA: Ia o le a ou oo i le penisione lau Afioga i le Fofoga Fetalai. Faafetai lava i lau Afioga i le Minisita o Tupe, ua i ai foi nai faamanuiaga i penisione mo tatou tagata matutua.

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

A o le tatalo a le sui usufono mo Vaimauga, po o le a se finagalo o lau Afioga i le Minisita aemaise foi le Ofisa Sili o Pulega ma le Matagaluega, e matauina lava le faafetai i lenei foi siitaga e faaopoopo i a latou tupe maua. A o le mea lea e matauina e lou nei sui usufono, o nai tagata ia e le mafai ona maua faamanuiaga i feoaiga i mea ia o vaa ma mea faapena o lea e penefiti ai latou. Aua o nai o tatou tagata matutua o la e gasegase i totonu o afioaga ma alaafafaga ma aiga, e le mafai ona latou maua faamanuiaga nei o le o i le vaa ma toe omai, o la e o fua. Ae po o le a se silasila a le Matagaluega, ave atoa i ai le latou faamanuiaga, i latou lea e le o penefiti tuuaia ia le vaega lea e mafai ona faaoga le penefiti lea ae tuu atu ia i latou nei e seasea ona malaga ae ave atoa i ai se latou mea faapea, faapea o lau \$200 lea ae te le o toe sau ua lava a oe i le tulaga lea. E pei e penefiti e malolosi ae le o penefiti i latou e gasegase... pei o lea e tau tu mai le Minisita....

FOFOGA FETALAI: Ia, se i tulai mai lau Afioga i le Minisita o Tupe.

Afioga Sili Epa Tuioi (Minisita o Tupe): Faafetai i le mataupu ua laga. O lo o faagasolo nei le suesuega i le Ofisa o Tupe faapea le NPF, o le Kamupani o Vaa faapea foi le Matagaluega o le Soifua Maloloina, pe le ua tatau ona toe sui se isi faatulagaga o le tulaga lea o penisione. Ae pei foi o le mataupu pei ona taua e le sui usufono mamalu, e le o tagata uma penisione o lo o faaogaina femalagaiga i le va lea o Salelologa ma Mulifanua. Ia atonu o se auala o lo o tilotilo i ai, pe le tatau ona siitia loa se numera maua le penisione i le masina, a o lona vaegatupe ona faitalia loa lea o le tagata penisione ona faaoga e totogi ai lona pasese e totogi ai vailaau ma totogi ai pe a o atu i le falemai e totogi ai tulaga faapena. Atonu o se faiga faapena o le a i ai le tulaga lea ua tutusa ai le aiatatau a le au penisione i tulaga ia. Aua pei lava ona silafia, o le tele o le vaegatupe lea e alu nei ona o le totogaina o le pasese i vaa, i le va lea o Upolu ma Savaii ia ma isi tulaga o latou o lo o gasegase ona o talavai ma le tulaga o le vaaiga... ae masalo po o se taimi e talanoa ai le Tala Autu o le Tupe 2019/2020 e oo atu ai i ina ua maea le suesuega ma le sailiiliga lea e i ai ona toe faatulaga lea o le tatou penisione ina ia mafai ona tutusa mo tagata uma. O le faaaliga lea. Faafetai.

FOFOGA FETALAI: Se i onosai mai o lo o i ai le... Tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o le taua ia o le fautuaga lea. O lea la faatoa tasi le mea sao a le sui usufono. O le matua taua ia o lau tuualalo, taua tele. O lea foi ua ou faamaumaua i i, o lea ua ou osiosia i le peni mumu. E taua tele le fetuunaiga lea ua aumai lea ua talifuaitu atu le Minisita o Tupe e toe faaopoopo sina vaega, ona pule ai lava lea o le tagata e fia tietie i le vaa pe a fia tietie vaa, pule le tagata ia i ana fualaau e fai, aua o le mea lea e tau masalomia ua alu atu uma ai lava ma penitolo a le aiga atoa e auala atu i le olomatua e mai.

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

O lea la ua aumai, tasi lea fautuaga matua aoga tele. A o lea la ua tafa le finagalo o le Minisita o Tupe, ia o ituaiga mea anoa ia e vave tele ona ioeina e le Kapeneta.

FOFOGA FETALAI: Ia, se i tulai mai le sui usufono mo Palauli le Falefa.

Afioga Hon Faumuina Tiatia Faaolatane Liuga: Faafetai i lau Afioga i le Fofoga Fetalai mo le avanoa. E ao foi lava ona fai se faamatalaga ona e foliga o le a tuuaia i matou nei e feoi i vaa. O le faatulagaga lea e i ai, na o le \$500,000 e alu i pasese o vaa. E \$1,800,000 tupe e alu i togafitiga faafomai ma vailaau. E silafia ai, e ova i le \$2,300,000 le tupe lea e alu i mea ia e lua. O le tupe lea e faaagaga e \$626,000, o le ono masina o le tausaga nei 2019. A tausaga atoa la, \$1,250,000 le tupe e alu i le siitaga i le \$10. Manaia pe a tuu loa i le \$200 ae soloia mea ia e lua. Ma lou faaaloalo lava.

Tofa Olo Fiti Afoa Vaai: Lau Afioga i le Fofoga Fetalai....

FOFOGA FETALAI: Ia, se i...

Tofa Olo Fiti Afoa Vaai: Lau Afioga i le Fofoga Fetalai, na o si mea lea... O le matou matau atu i le faalogologo atu...

FOFOGA FETALAI: O se mea e fia faasao po o se mea e fia....

Tofa Olo Fiti Afoa Vaai: O se mea e fia faasao.

FOFOGA FETALAI: E le mafai ona faasao e le isi sui usufono le lauga a le isi sui usufono, ae se i faapuupu mai.

Tofa Olo Fiti Afoa Vaai: O le matou faalogologo atu lau Afioga i le Fofoga Fetalai ma le paia o lenei Maota, o le manaia ia o le lauga a Vaimauga lea na fai mai. Ia o lea ua ote ote le Palemia i le lauga a o lea foi ua toe faapea mai e manaia, e taua. Ua ou le iloa la po o le a... ua agai i luma toe foi i tua le mea lea ou te vaai atu i ai...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia): O le mea e fia faasao, e le o se ote a au le mea lea na fai. O le tuualalo, o le tuualalo. Olo, o le tuualalo.

FOFOGA FETALAI: Ia, se i... E i ai se mea o fia saunoa ai le sui usufono mo Falealili Sasae?

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

Afioga Fuimaono Teo Samuelu Teo (Falealili Sasae): Lau Afioga i le Fofoga Fetalai, e tusa ai ma tatou Tulafono Tumau, na ona tuualalo atu, se i vagana le Minisita ma le Palemia e faasao maia se lauga ae le toe faasaoa e le isi sui usufono le lauga a le isi sui usufono o le Itu Agai. Ma lou faaloalo lava.

FOFOGA FETALAI: Ia, o le sao tonu a lena. Se o le mea lea ou te fiafia ai le sui usufono lea mo Falealili Sasae o le toaga e faitau le Tulafono Tumau. Ou te fautuaina foi lau Afioga i le sui usufono mo Salega Sasae, se i toaaga e faitau tatou Tulafono Tumau.

Ia tulai mai le sui usufono mo Vaimauga Sasae.

Afioga SULAMANAIA FETAIAI TAUILILI TUIVASA: Lau Afioga i le Fofoga Fetalai, e momoli le faafetai i le Afioga i le Minisita. Sili, faafetai ona ua tali foi le manao o la e faafofoga mai nai o tatou tagata matutua. O le mea lea o le suafa, a faaigoa oe e ou tuua ma ou matua i se suafa lelei, e te ola ifo foi e faamanuia lava le Atua. Sili, leaga o lou suafa Sili o le mea lea e faamanuia a le Atua ma e faia a mea sili ma e silisili ai lava. Na pau lava le eseese o le sili, ua e suea lava le tagata e tulua ia te oe, e le o i ai le manaia lea e maua ia te au, Sulamanaia. A i ai la ma le manaia, ua top top oe.

Lau Afioga i le Fofoga Fetalai, o le tulaga lea i mea o totogi o le Malo lea sa i ai le principal level. E matauina lava pei e faapito lava i le tulaga pei e lilifa i le Treasury ma le PSC le tulaga lea. A tau loa le principal a le Treasury ma le PSC, ai ona o latou ia e taiulu i ia tulaga. Ae ou te talosagaina le tulai mai o lau Afioga ma le... o le principal lava o le principal. Na pau lava le Matagaluega e tataua ona tuu i ai i totonu faapena e ogatasi ai, o le level lea o le principal a le Matagaluega a Tialavea, aua o lau Matagaluega Sili na o le suega o Tupe ma le faasoasoina, a o le Minisita o Tupe Maua, o ia lea o lea e tigaina e sue mai ma ao mai tatou tupe. O lea la, a tuu la i ai i totonu ma le Matagaluega o Tupe Maua i le level lena, ua matua silisili lava oe.

O le tulaga o le siitaga o tatou totogi i totonu o le Malo, ua matua lagona lava le faafetai. A o lau vaai, o le Private Sector lea e popole i ai lou sui usufono. E pei ua lilifa tatou i totonu o le tatou Malo, ae o tua lea... E le o vaai lou manatu i tulaga i le siitaga lea i kamupani malolosi foi nei e mafai ona afford e latou ona pay a latou tagata faigaluega, a o nai tagata pisinisi taitoatasi e loo i ai le malos i totonu o le siitaga lea ua tuu i ai e lo tatou Malo, e le afford ina e latou ona pay o latou tagata faigaluega.

O le tatalo lena a lenei sui usufono i lau Afioga, pe le mafai ona e silasila ifo i ni faamanuiaga e tuuina atu ia i latou nei aua o lea ua alu i luga le Malo. Mo se faaitaiga, o tua i le private sector, ua leva ona i ai isi private sector ua \$3 o latou totogi amata, e le mafai ona oo i ai le tatou Malo. O lea la ua toe siitia tatou faamanuiaga, o lona uiga la o tua i le Private Sector pe ua amata nisi i le \$4.

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

A o tagata la faipisinisi taitoatasi... ua le mafai e i latou ona totogi a latou tagata faigaluega, ona faasea foi lea o latou i le faatinoga o lea galuega. Se i vagana standard i le totogi lea o le ... i le omai i totonu a le aufaipisinisi ia, e lagona lava le fialia o lou sui usufono, ua mafai ona compete tatou ma nai tagata ia, e moni e leaga le quality o latou oloa, ae pei o lea e tua i ai tatou. Mo se faaitaiga a o atu tatou nuu i faleoloa a tatou e \$5, e o lava e tuli le faleoloa o le Saina la e \$4.99, a o le sene lava e tasi, ae ou te faafetai ua i ai nai ia tagata.... ae tatalo, se i silasila ifo i tatou tagata faigaluega ia o lo o faaogaina i le maualalalo o le tupe lea o lo o tuuina atu. O le Tala o le Tupe lea na taua e le sui usufono pei o le aotelega, ua i ai nisi o Faalapotopotoga a le Malo o lea ua toe tuuina atu ai foi nisi tupe i totonu o le tatou Tala Autu, faaitaiga o le Uesetete faamolemole pe le mafai ona silasila ane i ia ituaiga Corporation a le tatou Malo, pe le mafai ona tuufaatasi i totonu o se Matagaluega e tasi. Pei o le uiga o lau tala, pe aumai uma loa i lalo o le Samoa Land ina ia....

O le Tala Autu o le Tupe la, e matau le sui usufono e pei o le aotelega ua i ai nisi o Faalapotopotoga a le Malo, o lea ua toe tuuina atu foi nisi o tupe i totonu o le Tala Autu, faaitaiga o le Uesetete, faamolemole pe le mafai ona silasila ane i ia foi ituaiga Corporation a le tatou Malo, pe e le mafai ona tuufaatasi i totonu o se Matagaluega e tasi. O le uiga o lau tala pe le aumai i lalo o le Samoa Land ina ia foia ai le tulaga o le toe ave foi o tatou tupe e toe totogi ai ia vaega aemaise foi o le aufaigaluega ae le tuuina mai i totonu o se Matagaluega se tasi e pei o le Samoa Land lea ua tatou i ai nei.

FOFOGA FETALAI: Toe lua minute o le sui usufono.

Afioga SULAMANAIA FETAIAI TAUILILI TUIVASA: E faaiu atu sa matou faamatalaga, e usitaia tele e le sui usufono mo Vaimauga i Sasae, e moni lava e te sau mai tua o oe lava o le tama o le eleele o Vaimauga i Sasae. Avea lenei itula e momoli atu ai le agaga faafetai a lou sui usufono i le paia o le tatou Malo, afio lau afioga i le Palemia le sui Palemia le Kapeneta ma i latou uma lava aemaise sui usufono, aemaise foi ona o le tulaga foi sa i ai lenei aiga e tusa ai ma le faalavelave na valaaulia ai foi e le Atua si ou atalii. I lenei itula e faanoino atu i lau afioga i le Fofoga Fetalai e avatu ai se agaga faafetai e le gata i le faatinoga i le taimi sa i ai i le falemai seia oo lava ina valaau le Atua, e le i alo lava lau afioga i le Palemia ma se taumafaiga sa i ai, e oo foi le agaga o le faafetai i le tulaga i lo outou alofa tulai, e ala i seleni, o tupe, aemaise foi o e sa ofoina o latou toto sei tulou, mo si ou atalii. O lo o silafia e le Atua, o le tatalo ia agalelei le Atua ia te outou i soo se tulaga na outou faamanuia ai, o lea tou te vaai mai o lo o malosia pea le sui usufono mo Vaimauga i Sasae, ona o le tagata o le auauna faauuina a le Atua. O taimi faigata o taimi na o lea e test ai le tamaloa e le Atua po o le a le malosiaga o lo o i ai.

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

O lenei itula e momoli atu ai le agaga faafetai i e na faaeleelea ma e sa aumai o latou loto ma a latou fesoasoani, ua oo lava i o outou loimata ua maligi ona o lo outou alolofa aemaise ua faaeleelea lo tatou atunuu aemaise le Ao Mamalu o le Malo ma Samoa ma le aufaigaluega, silafia e le Atua o lo matou leo lena i lenei itula e momoli atu ai le agaga faafetai. Aemaise o lenei itula e fia fai atu ai sa ta tala lau Afioga i le Fofoga Fetalai, i le valaau Paia a le Atua i si ou uso nei o Sefo Pau, o ia sa ma mafuta i le taimi sa i ai si ou atalii. Ae faamaise le Atua i lau afioga i le faletua Ana aemaise nai ou alo. Aua le popole ua i ai nei Sefo Pau i le ola e faavavau. Ona o le suafa o Iesu Amene.

FOFOGA FETALAI: Malo faafetai i le saunoaga a le sui usufono mamalu mo Vaimauga i Sasae. O le avanoa lenei e tapa le sui usufono e tulai mai e saunoa. Matau atu ua tulai mai le sui usufono mo le Itumalo Tu Taulaga i Sisifo. Saunoa ia manuia le saunoaga a le sui usufono.

Afioga FAUMUINA ASI PAULI WAYNE FONG (Itumalo Tu Taulaga i Sisifo): Faafetai i lau Afioga i le Fofoga Fetalai, faafetai foi i lenei taeao manuia i le alofa o le Atua, le afio a lau afioga i le Palemia lau afioga i le Sui Palemia aemaise foi afioga i Minisita, aemaise foi i latou o lo o faufautua i Minisita ae faapena foi lenei itu. O le agaga lava ia o lenei sui usufono lau afioga, o mea lava e fia faalelei, o a foi ni fautuaga e avatu ina ia mafai ai ona nofo fialia tagatanuu o lo tatou atunuu.

O le mea muamua lau afioga i le Minisita o Aoga, faafetai tele mo fuafuaga faaleaoaoga i fanau, aemaise foi le faaiuga o lena tausaga ua iu ma le manuia. E popoto lava tamaiti e popoto ona e toaaga e fai meaaoga, e leai lava ma se mea o afaina ai oe i lena tulaga. A ua le poto lava le tamaitiiti ia ona o ia, e pau lava o le tulaga ua oo i ai. A o le tatalo i lau afioga, sa i ai le agaga i Tupe i le Tala Faaopoopo o le Tupe, sina fesoasoani mo le Iunivesete o Samoa e uiga i le lesitala o tamaiti fou ma le lesitala o tamaiti o lo o aooga i le taimi nei. O lea foi ua toe siitia mai, e i ai lava le talitonuga o siitaga lelei, aua foi le faatinoina o aooga ae se paga lea e le tutusa uma tulaga o aiga ma fanau. Sa i ai le agaga e tumau pea le lesitala a le Iunivesete sei uma lenei nofoaiga, sau lea o se isi Minisita e tago ia e sii i luga, ae ua faigata lava i le taimi lenei. Afai la e toafa pe toalima si au fanau e o i le taimi e tasi, e lagona lava le afaina ona o le le lava o le faasoa.

Lau Afioga i le Minisita o Galuega, o oe lava e sulu i ai le atunuu i tulaga faapenei, o lea foi ua silasila atu ma tagai atu i le Tala o le Tupe faaopoopo e le lava se tupe o ave i le Matagaluega o Felauaiga i le Eleele. Ae talitonu o lena e i ina le talosaga a lenei itumalo, o lea o le a fai uma auala e tau i Sasae ma Sisifo, ae o la lava e aloalo Falelauniu i omoomo o le tatou auala. Ou te le iloa tele i ai sa i ai le talosaga sa avatu, ae faapea mai o le Samoa Land Corporation, o lena foi e saofai mai i ina le Minisita o le Samoa Land Corporation e fesoasoani ifo, ua faatuputupulaia le aofaiga o tagata i Falelauniu ma Siusega, ae o le faalavelave e le o faatuputupulaia le lelei o auala. O lea e tatalo atu ai lau Afioga, ia toe tilotilo ifo lava i ai nei tei ua uma atu ia tausaga.

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

FOFOGA FETALAI: Malie le sui usufono se i tulai mai le Minisita mo Galuega tetele a le Malo.

Susuga Hon Papaliitele Niko Lee Hang: Faafetai mo le avanoa. E le fia faalavelaveina foi le saunoaga matagofie a le sui usufono mamalu. Ao lou tulai atu e tali atu manu o maua le avanoa i le tulaga lea, o le tupe lea e saunoa ai le sui usufono mamalu e le lava. O lea e manino lava i le tupe, e na o le siiga o tologi, o le tupe lea e i le main estimate o lea e faatino ai galuega o a tatou auala. O le tulaga lea e saunoa ai le sui usufono mamalu i le afioaga lea, o le auala e faapea e tatau ona faatino e le Samoa Land Corporation, e leai o galuega uma ia ua pasi mai e le LTA. Ae o le talosaga i le tuualalo ia tatou onosai, o le tele ia o galuega tau auala ia e taumafai atu i ai le Pulega, aemaise foi o lea e tapena auala aua tapenaga o taaloga a le Pasefika lea e loma nei. O le faagasologa la o le faaleleiina o auala i Tuanaimato lea e ave atu ai le faamuamua ae o lea lava e tapena le maintenance o auala e agai atu i Vaitele ma Falelauniu, e pei o se faaaliga lea i le mataupu ua laga mai e le sui usufono mamalu, faafetai.

FOFOGA FETALAI: Tulai mai le sui usufono..

Afioga FAUMUINA ASI PAULI WAYNE FONG: Faafetai lava i lau Afioga i le Minisita, o lea la ua maua atu o oulua lava ma le Pule Sili o Felauaiga i le Lauelele e pau i ai la tatou mataupu. O le a taatia atu, o le onosai ia o le matua lava a o le onosai.

FOFOGA FETALAI: Malie le sui usufono o saunoa sei tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: Ia faasaoina le toe tutulai mai o isi foi sui usufono ma laga le mataupu lenei, i le tulaga lava ia tau auala e ave i ai le faataua a tatou uma lava, o le limasefulu sui usufono o le Palemene lenei. O la ua manino e faapea ona fai mea e faasolosolo. A uma foi ona taoto a tatou polokalame e oo lava i le 2021 i le amataga o la lava e faagasolo le tatou polokalame. Ae amuia outou e fai toeitiiti oo i le palota, aua e manatua lava e tagata auala na. Ao auala e muamua fai e le toe manatua e tagata. O le mea lene e taua ai, o la e faagasolo ia galuega, ao le upu lea e aumai e le sui usufono, e faanoanoa ona o le Tala Faaopoopo o le Tupe, o le mea lea e masani ona galo ia i tatou, o le faaopoopo e na o le faaopoopo, ao le tatou fuafuaga Autu o lea ua uma ona taoto i le Tala Autu o le Tupe o lo o faagasolo, nei tei ua toe sau ai se isi, ao polokalame ia ua uma ona faataotooto. E i ai mea e tatau ona fai nei, e oo lava i le malo o Amerika o le malo pito i sili na ona milionea, pilionea, kilionea, ae faa budget e pakeki uma lava mea uma e le mafai ona fai i le tausaga e tasi.

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

O lea ua outou faalogo atu ua taofi mea uma ua le toe gaoioi le Malo Amerika. Ua nofo seiloga e pasi muamua le paketi ao tatou o lea e alu lava, e na o le mea faaopoopo lea e aumai ma isi mea faaopoopo ae o la e alu lava le tatou paketi e lei uma, ae o lo o i totonu o le Tala Autu.

FOFOGA FETALAI: Se i tulai mai le sui usufono o lo o saunoa.

Afioga FAUMUINA ASI PAULI WAYNE FONG: Faafetai i le fesoasoani mai o le Palemia, o lea lava e mataitu. Ae o ala lava o manatu ina ia avatu aua se fesoasoani mai aua foi le lelei o le atunuu. Lau Afioga i le Minisita o Tupe, e talitonu le agaga o lena e i ina le faasoa, aemaise foi o lena e te lua alala faatasi mai ma le Minisita o Aoga. E silafia ua mu le faleaoga o si o matou nuu o Vailoa, ao lea o le a amata aoaoga faaletausaga. E talitonu foi o lo o i ina le insure o faleaoga o lo o faasoasoa mai lava e le Matagaluega o Tupe. E na o se tatalo, pe mafai ona faavavevave ifo lava ona o le tulaga lea ua i ai, o lea o le a aoga tamaiti i fale o aiga, ina ia mafai ona faamaopoopo i le amataga o lenei tausaga. E manaomia lea fesoasoani ina ia vave faatino le faamoemoe, aua e talitonu sa susunu e le'i .e le iloa po o ai na susunuina. O lo o i ai pea suesuega a leoleo o lo o i ai. Aua e leai se mea e nofonofu mu, talalili, vagana ua talalili atu i ai se tagata le lelei. E na ona faapena atu, o lo o i ai foi le savali a le Komiti o aoga a lenei nuu, aemaise foi o le Komiti a le aoga, ina ia fia maua se fesoasoani ae le i amatalia le aoga, ina ia mafai ona faaaoga tamaiti. Pau ia o nai manatu e tuu atu i le Tala Faatatau Faaopoopo o le Tupe, ona e le lava se tupe e faasoa ai isi manatu ia e fia ave atu. Faafetai tele i lau Afioga i le Fofoga Fetalai, foai e le Atua lou malosia aua le tauaveina o tiute.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaai: Lau Afioga i le Fofoga Fetalai ao le i nofo i lalo le sui usufono e taua tele le mataupu lea. Ona o lea e le i mamao atu ona toe fausia le faleaoga a le Kolisi o Siumu na mu, ao lea la ua fai e le Malo le isi auala lea o le insure uma o faleaoga, ina ia fesoasoani mai le Kamupani Insure. Ao le Kamupani Insure e le mafai ona tatala maia tupe seiloga e uma a latou suesuega, pe na faapefea ona mu. O le mea lava e maofa ai leoleo, o le mu o la e nofo ai tagata e vaia, o la e siosio e aiga ia e aoga ai a latou fanau, ae leai lava ma se isi o latou na telefoni i le fuimu, ao le fuimu la e tu i uta i tafatafa, o la e i gauta atu lava. E pau lava le mea, o le logo o le taavale fuimu, sau loa tape le mu, ae la sa nofonofu lava ma matamata ma talitalie aiga uma lava ia e siomia ai le fale, ae o lea e aoga ai a latou fanau, ae e leai lava ma se isi na fesootai i le tatou fuimu. O la lava e i uta e le mamao. O le itu taua mo le faafogafoga mai a aoga uma lava i le itu lea, ia tofi ifo komiti e ola, komiti e vaia le faleaoga faapea foi ma i latou o lea e vaia, o la e i ai le aiga e vaia le faleaoga lea. Ae mu ae le telefoni i le taavale fuimu, e lelei ona mataitu lelei le mea lea, leaga e faapea foi le mea na tupu i i, lea na mu ai le maketi. E mu lava le maketi ao la e tilotilo i ai le toatele o tagata.

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

O mea ia e tatau ona mataitu ma o le auala foi lena e masani ai ona fai faasalalauga a lo tatou fuimu e tau mai le fuainumera, ina ia manatua vave e tagata ma telefoni mai loa ma fai loa le fofo. O le taua o le itu lea ona seiloga e maea suesuega, ona faatoa faagaioi loa lea o le faamalositia o le fale. Aua o le mea lena e moomia e Insure, afai e faamaonia na susunu e se isi, e leai se tupe e aumaia. O le mea lena e nofo uta i ai. Afai na susunu e se isi, e se isi o le komiti, e leai se tupe e aumaia e se Kamupani Insure.. fale aua o le mea lena e moomia e le Inisiua. Afai e faamaonia na susunu e se isi e leai se tupe e aumaia. O le mea lena ia nofo uta i ai, afai na susunu e se isi, e se isi o le komiti, ia e leai la se tupe e aumaia e se Kamupani Inisiua.

Afioga FAUMUINA ASI PAULI WAYNE FONG: Ia lau Afioga i le Fofoga o le Fono, faafetai tele atu lava i le fautuaga a le Afioga a le Palemia o la e sao lelei lava ia, sao lelei. Ia lea foi e faalogologo mai le Komiti o Vailoa aemaise foi le Komiti o le Aoga, o mea ia e tatau ona fai pe a tulai mai. Ia ae mo le fesoasoani mai, ia o le Malo lava o tatou e tatalo atu i ai ia pe a ua iloa e leai se auala e mafai ona faatino ai ia tulaga. Faafetai tele i lau Afioga.

FOFOGA FETALAI: Malo, ia ua avanoa foi le Palemene mo se saunoaga. Ia e maitau atu i le tulai mai o le sui usufono o Lefaga ma Faleaseela. Ia tulai maia lau Afioga i le sui usufono mamalu o Lefaga ma Faleaseela.

Afioga TOLEAFOA KEN VAAFUSUAGA POUTOA (Lefaga & Faleaseela): Lau Afioga i le Fofoga Fetalai ma le mamalu o le Maota, o le a ou le toe asaina i tua le leo o lenei itumalo o lea ua maea ona vaisausauina Paia o le Atua, paia o le Tafatolu o le Faigamalo, faapea paia o le atunuu. O le a le toe oo i ai le leo, o le a tuu sao loa se taofi aua le Tala Faatatau o Tupe Faaopoopo (Nu.1)2018/2019 o lea ua taoto i totonu o le Palemene. Lau Afioga i le Minisita o Tupe, momoli atu le agaga faafetai o lenei itumalo, i le lufuluifiina ma le lufilima faasoa o lau Afioga a le Minisita, aua le faasoasoina o lenei Tala Faatatau o Tupe Faaopoopo (Nu.1) 2018/2019. E matua lagolagoina e lenei itumalo le Tala Faatatauina o Tupe Faaopoopo (Nu.1) 2018/2019. E momoli foi le agaga faafetai i lau Afioga ona o lea ua matau atu o le a siitia tulaga o totogi o le aufaigaluega a le Malo, a o lo o faasolosolo mai i e pito i lalo e maualalo totogi. Malo le tofa malo le faautaga mamao. E momoli foi le agaga faafetai i lau Afioga i le Minisita o Tupe ona o lea foi ua matau atu o le a siitia penisione a nai o tatou tama ma nai o tatou tina matutua. O lea ua oo i ai le faasoa a lau Afioga i le Minisita. E momoli atu ai le agaga faafetai a lenei itumalo, ona o le fuafuaga o lenei Tala Faatatau o Tupe Faaopoopo ma e matua lagolagoina e lenei itumalo. Ona ou oo mai lea i le Minisita mo Faamasinoga, se i silasila ane lau Afioga i le tulaga o totogi o mea nei o poloaiga le tumau. O lea e matau atu o lea e tau i ai siitaga lea ae ou te iloa e le o lava ia siitaga. Toe silasila ifo ai ina ia malosia lea tulaga ina ia faafaigofie foi aemaise foi latou o oo i ai nei poloaiga, ia e tatau lava ona faamamafaina e le Matagaluega ia tulaga aua le agai i luma.

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

Ona ou agai mai lea i le Minisita mo Galuega, Felauaiga ma Atinae Eeese, faafetai mo galuega lelei aua le faasolo mai o tatou auala ia e agai mai Saina agai i le malaevaalele. Momoli atu le agaga faafetai i ia galuega tetele o lo o taumafai e faaleleia aua le agai i luma o le tatou atunuu. Momoli foi le faafetai i lau Afioga ona o le tulaga ua i ai le tatou malaevaalele. Ua matauina foi e nisi malaga mai atunuu mamao e pei ona tatou i ai i le Kirisimasi ma le Tausaga Fou, ia ua lagona lava le siitia o le tatou atunuu e ala i le tatou malaevaalele i Faleolo, ia aemaise foi le faatinoina o auala fasitepu foi ia e agai atu ai ia tatou pasese agai i le vaalele. Ia na ona toe taoto atu lava i ou autafa lau Afioga i le Minisita, o lena ua saunoa le Taitai o le Malo, ia o lena ua i ai lau faasoa i a tatou auala, o le a le toe oo i ai se faamatalaga a lou sui usufono. Ona ou oo mai lea i le Minisita o Vaalele, malo le onosai, malo le le faalogologo tiga, o lea ua matau atu o le a toe taunuu le isi a tatou vaalele, ia malo le faamalosi. O lo o matauina ua malosi le lagolago a lo tatou atunuu aua le tatou Kamupani Vaalele, pau lava le tatalo i lau Afioga i le Minisita, e i ai nisi o auunaga e le o atoatoa, ia onosai lau Afioga e toe faaatoatoa lelei aua le agai i luma o le tatou Kamupani Vaalele.

Ona ou oo mai lea i le Afioga i le Minisita mo le Soifua Maloloina, o lea ua matau atu o le a toe faaleleia ia o tatou falemai i nuu i tua. O le a toe faamalosi foi ia tatou Komiti Tumama. Ia e momoli atu ai le agaga faafetai, ae na ona toe tuu atu lava i ou autafa le talosaga a lenei itumalo, ia o lena ua e silafia lau Afioga i le Minisita. Ua faatupulaia le aofai o le itumalo, ia ae e le o i ai sona falemai. Avea foi lenei avanoa i lau Afioga i le Minisita, e fai ai lou leo faatauvaa e momoli atu ai le agaga faafetai, ona o se tasi o tamalii o lenei itumalo, lea sa momoli atu i Initia, ona o nisi o togafitiga. Malo le tofa malo le faautaga mamao i lau Afioga i le Minisita aemaise lo tatou Malo ona o seleni ua faaaluina aua lea tamalii o lenei itumalo ua aoga i ai togafitiga, ia o lea ua talii mai ma le manuia e momoli atu ai le agaga faafetai i lo tatou Malo.

Ia faamanuia le Atua i lau Afioga i le Palemia ma le Kapeneta, lau Afioga i le Fofoga Fetalai, ia maua pea lou malosi i le tino, ae sili i la lea agaga. Manuia le fonousu a Samoa, soifua.

FOFOGA FETALAI: Malo faafetai, o, ia o le sao la ia o lauga e aanoa puupuu. Ia tulai mai se isi sui usufono e fia saunoa. Ia tulai mai le sui usufono o Gagaifomauga Nu.3, sui usufono tamaitai o Gagaifomauga Nu.3, e saunoa mo lou avanoa.

Afioga FAAULUSAU ROSA DUFFY STOWERS (Gagaifomauga Nu.3): Faafetai i lau Afioga i le Fofoga Fetalai mo le avanoa, faapena foi ona faatalofa atu i lau Afioga ia faapea foi sui usufono mamalu o le Maota, Samoa potopoto ia faapea foi Samoa o lo o faafogafoga mai. Ia ao le i faaleoina foi se lagona e tusa ai foi o le Tala Faatatauina o Tupe Faaopoopo (Nu.1) 2018/2019, ia nao ni nai faamaisega lava foi mo le faletua ia Ana ma le nofoaalo e tusa ai ma le valaau paia a le Atua, ia faapea foi le Afioga ia Tafua, sa faapena ona amia le tina o lona tuua, ia faapena ona faamaise atu i ai ia te ia, ia faapea le paia o le aiga.

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

Ia ona oo atu ai lea o se faamatalaga i le tatou Tala Faatatau o Tupe Faaopoopo (Nu.1) 2018/2019. E ui lava ina tulai atu se sui usufono faaleoina le lagona lea aumai i ai le tuualalo foi a le Afioga i le Palemia, ae ou te toe faaleoina foi lava. Pe otegia mai foi pe tuualalo mai foi e talia lava ma le agaga fiafia. Ae ou te talitonu foi lava au ia i estimates mai le amataga o le tausaga, e ao lava ona i ai le atoaga foi lea i le faiga o le Main Budget. A i ai ni mea e toe faaopoopo lona lua ifo, ia ou te talitonu o le vaega ia o...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: O le agaga lena i Malo uma o le lalolagi, ia aua ne i toe faia ni faaopoopo, aua foi ne i toe faia ni toese. E oo a i Malo tetele o la e faulai ai ia tagata atamamai. Ae e le mafai ona faatino lena manao. Aisea? Leaga foi e te leiloa le mea e tupu i le aso a taeao. E na o le Atua lava e na te silafia mea e tutupu i le lumanai. O le mea lena, po o le a le poto o le tagata i le lalolagi lenei, e fuafua ia tupe e mafai ona faaalu i le 12 masina o lumanai, e le mafai ona sao. O le poto o tatou o le matua valea aiai i luma o le Atua. E na o le Atua lava la e na te silafia mea e tutupu i le 12 masina o lumanai o le mea lena e le mafai, le mafai ona alofia le mea lea.

E tele Malo, e tele foi o le mau experts e o mai mai fafo e o mai lava aumai ituaiga manatu aua o ituaiga manatu foi lea mo le poto foi lea o le theory o mea tau book learning. Ae o le lalolagi lea e tatou te ola ai, o le lalolagi o mea moi e tutupu, tatou te leiloa mea tutupu i le lumanai. O le mea la lena ua ou tulai soo lava e faamalamalama le tulaga lenei talu ona ou sau i le Maota lenei. Ae o mea na e fai mai ai ia le anoano o mau experts. O le expert, fai mai le definition a le isi tagata, o le expert, *ōis somebody that started of knowing little of everything, until he reaches a stage where he knows absolutely nothing about everything*". O le tulaga la lena i mo mea o mafaufauga ia faa expert, e le mafai ona e aveesea le mea lea, na o le Atua na te silafia mea e tutupu i le lumanai.

FOFOGA FETALAI: Ia ua manino le fesoasoani a le Afioga i le Palemia.

Afioga FAAULUSAU ROSA DUFFY STOWERS: Faafetai lava mo le Afioga i le Palemia mo le faauilavea. Ia o lea ua matua tele atu le otegiaina o au nai lo le sui usufono lea muamua. Ia ae...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai.....

FOFOGA FETALAI: Ia se i toe tuu atu i le Palemia...

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafoaiga i luga o le faitauga faalua**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lea foi la ua ou toe tu atu leaga o mea ia o tatou Tulafono Tumau. E limataitaiina tatou i Tulafono Tumau, o le mea e fia faasao, ma le mea e fia faamalamalama, ae e le o se ote, e leai ma se upu faapena o i ai i totonu o le tatou Tulafono Tumau o le ote. Leai, o le sao, o mea e fia faamalamalama po o le mea e fia faasao. E le o se faasaoga la o oe lea na ou tulai atu ai, na ou tulai atu e faamalamalama.

Afioga Sulamanaia Fetaiai Tauiliili Tuivasa: Lau Afioga i le Fofoga Fetalai o sina mea e fia faamalamalama.

FOFOGA FETALAI: E faamalulu atu i le sui usufono mamalu, malie le sui usufono, malie lava le sui usufono, malie le sui usufono se i fai atu le upu lea a le nofoa, malilie sui usufono o lea ua tapa tuli o outou suafa, onosai mai se i tau faagasolo atu la tatou galuega. O le a faaauau le saunoaga a le sui usufono mamalu pe a talii mai ia le tatou malologa masani.

Na faataatia ese Taulumaga a le Fono Aoao mo lana malologa masani i le itula e 10:48 i le taeao ma toe faaauau ai i le itula e 11:33 i le taeao.

Na toe faaauau Felafolafoaiga i luga o le faitauga o le Tulafono Tau Faaofi o le Faatatauina o Tupe Faaopoopo (Nu.1) 2018/2019.

FOFOGA FETALAI: Faafetai ua maua se faasiligamalosi e faaopoopo ai le malosi e faaauau ai la tatou galuega i le mamalu o le Palemene aemaise foi Faauluuluga o Matagaluega ma Faalapotopotoga. Ia ma ou te tapa ma le faaaloalo lau Afioga i le sui usufono mamalu o Gagaifomauga Nu.3 e faaauau lau saunoaga.

Afioga FAAULUSAU ROSA DUFFY STOWERS: Faafetai i lau Afioga i le Fofoga Fetalai, ia e faapena foi se lagona e talitonu ua maua le faasiligamalosi i le mamalu o le Maota.

Ia o le a oo atu loa se faamatalaga i le Supplementary lava lea e faatalanoaina, e momoli atu ai le agaga o le faafetai tele i le Minisita mo Lafoga mo le tele foi o le sao o lo o matauina mai foi i le taumafaiga o tatou tupe maua. Ia e faapea foi faamauina le lagona o le faafetai i le Afioga i le Minisita mo Faalapotopotoga Tumaoti o lo o matauina le alualu i luma o le faatinoina o le galuega, o lo o atagia mai ai i tupe maua e ala mai i dividends ia e aumai i totonu ai taumafai ai ia le paketi. Malo lava faafetai, ia o lo o matauina foi o lo o i ai nai payments ia o statutory payments ae o na e pei e credit mai po o a ia vaega tupe. Po o ni vaegatupe ua faasaoina mai totogi o ni statutory payments po o a nisi vaega faapena.

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

Ia ae malo lava faafetai mo le mataala i vaega ia ina ia mafai ona tapue mai ai nai seleni aua le faatinoina o a tatou galuega. Ia ma e lagolagoina malosi ai e lou sui usufono le Tala Faaopoopo Faatatau o Tupe Nu.1 2018/2019.

Ia ae o le isi vaega e fia faaleoina ai se manatu lau Afioga i le Minisita mo Aoga, o lea ua maua nei o la ua maua ia faamanuiaga foi ia a aoga mai i tupe ia i grants ma tulaga faapea ma e momoli atu ai le faafetai. Faafetai i le faigamalo i lenei tausaga ua vave ona maua seleni a nai aoga e tapena ai le amataina o aoga o lenei tausaga faaleaoaoga. Ae faapena foi ona maua ai e lou sui usufono, ua na o sina vaega o nei faamanuiaga o lo o maua e aoga, e agavaa e faaaoga mo totogi o faiaoga. Ae na ona ou toe tuualalo atu po o fea o i ai le tofa i ina ona o lo o maitauina mai i tupe na maua i tausaga ua mavae, o le tupe atoa lava sa faamatuu mai e alu uma mo totogi o faiaoga. Ae paga lea, o le faamanuiaga lea ua maua mai nei, e na o le 30% lea ua aumai i totonu o le manual lea e mafai ona agavaa ae faaaoga e totogi ai totogi o faiaoga. Ae mo le silafia foi lava, o aoga nei a ekalesia mission schools, e faamoemoe tasi lava i le fesoasoani nei a le Malo.

O le tupe atoa uma lava sa faamatuu mai, e alu uma mo le totogi o faiaoga, ae paga lea, o le faamanuiaga lea ua maua mai nei, na o le 30% lea ua aumai i totonu o le manual fai mai e tataua ona agavaa e faaaoga e totogi ai totogi o faiaoga. Ae mo le silafia foi lava, o aoga nei a Mission School, e faamoemoe tasi lava i le fesoasoani lenei a le Malo, o i ina e aumai ai... e talanoa atu o le matou Ekalesia lea e ova laitiiti atu lava o le 50% e mafai ona kava totogi o faiaoga mai le grant lea a le Malo like pe 51% ona faaaoga ai loa lea o pili aoga ma mea uma faapena i totonu o aoga.

Ae peitai ane lea ua maua nei ua maua le tala ua faaopoopo faatasi, ua sau faatasi uma mea uma, aua sa i ai le grant lea faapea e maua ai resources ma le grant lea e sau i totonu o le paketi lea e fesoasoani ai i totogi o faiaoga. Lea la ua sau faatasi nei, a o le isi foi mea fou lea ua i ai mo le silafia, o Ekalesia e i ai o latou Ofisa Tutotonu, e tai pei o le Ekalesia Katoliko, e i ai lava le latou Ofisa Tutotonu o Aoga, e alu sao lava la i ai le vaegatupe lea, ona faapena ai loa lea ona vaevae pei o le vaevaega lena e aumai i ina, nai suiga laitiiti lava e consider ai nai aoga ia e laiti le fuainumera. A o le tele lava na o mission schools lea e i ai, e i ai lava latou central office e alu agai i ai tupe, ae peitai lenei vaitau ma le faamaapeina mai o le fesoasoani a aoga, o lena ua alu sao lava i totonu o aoga. E leai se mea o i ai, o lena e manaia lava le tofa lena, ae pau lava le mea o le tuualalo i lau Afioga i le Minisita faapea le Minisita o Tupe pe mafai ona toe liuliu le tofa i le pasene pe le mafai ona faaaogaina mo totogi o faiaoga na o le 30%. A faapea la o le isi aoga lea ua ou iloaina nei na o le \$21,000 le latou tupe ae na o le 30% e faaaoga i totogi o faiaoga, a o le aoga o le aoga a le kolisi, e le iloa pe faapefea ona fai, ae na o se tuualalo atu faapena i lau Afioga, ma toe tau... pei ua tigh tele restrictions la ua impose atu i luga o le tou manual lea mo nai aoga, e fesoasoani ai foi i nai Pule Aoga ma tulaga faapena. Ae o le tuualalo, a o nisi vaega uma, malo lava le galulue i a outou Afioga.

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

Ae o le mea mulimuli lava lea ou te fia talanoa atu ai, o lau talosaga ma se tuualalo. O lau talosaga faamolemole lau Afioga i le Palemia, se i tuu atu lava le malae o Aopo i lau lisi foi lea faatoa faatino i le 2020-2021 faamolemole aua o lena e i ai nai galuega na. O le talosaga lena i lau Afioga ma le agaga faaaloalo, ia ma le tuualalo o le vaega lenei pe faaupu foi o matou lea e agaia atu a outou Afioga, ia o a foi ni o matou vaivaiga e faaleoina ma ni manatu e ave atu, o matou manatu na sa matou tapena mai i ai aua le agaia o a outou Afioga. A faapea foi e avatu se lagona e paopapa, ia toa pea le tai..toa pea le tai. Ma lou ava ma lou faaaloalo tele. Ia faamanuia mai le Atua i le Fonousu a Samoa.

FOFOGA FETALAI: Malo faafetai saunoa i le sui usufono mamalu mo Gagaifomauga Nu.3, o se tasi foi o tausala o le Maota. Ia ua avanoa foi le tatou lumamea nei o le Palemene mo se isi saunoaga.

Ia, ou te vaai atu o tau olioli mai le sui usufono o... Malo, o lea ua tulai mai le sui usufono mo Vaisigano Nu.2, tulai mai e saunoa.

Afioga TAPULESATELE MAUTENI TAMASONE METULI II ESERA: E faafeiloai atu i lau Afioga i le Fofoga Fetalai i lenei taeao, Fono Aoaofaitulafono a Samoa. Ma e faafetaia foi le alofa o le Atua Silisili ese ua mafai ona tatou aulia mai lenei tausaga fou.

E manatua foi le valaau paia a le Atua ona tatou te manatu alofa i le valaauina o nisi e pele i agaga ma loto o i tatou, le valaauina o matua ma fanau, o nisi o sui usufono mamalu o le Maota nei. O le loto faamafanafana foi i le faletua ma le fanau ona o Lana Pule Tutasi i se tasi o Tootoo o le Maota nei.

Lau Afioga i le Fofoga Fetalai, e faafeiloai atu ma faatalofa atu i lena Itu o le Maota i lau Afioga i le Palemia, Sui Palemia, le Kapeneta, Minisita Lagolago, ma lenei foi Itu o le Maota nei i alii ma tamaitai sui usufono.

E faatalofa atu i lau Afioga i le Faamasino Sili ma le Matagaluega o Faamasinoga, le Failautusi ma le Ofisa o le Fono Aoaofaitulafono, Ofisa Sili o Pulega ma Pule Sili o Matagaluega ma Faalapotopotoga a le Malo, faapena le mamalu o lo o sasao nei. Ona ou faaleo lea, tulouna ia le faafofogaaga a Lana Afioga Mamalu Le Ao O Le Malo Tutoatasi o Samoa ma le Masiifo, le Sui o le Fono a Sui Tofia ma le Masiifo. Tulouna ia le tapuaiga a le afaigaluega a le Atua, aemaise si ou itumalo o Vaisigano Nu.2.

Lau Afioga i le Fofoga Fetalai, o le a agai loa se faamatalaga e tusa ai ma le Tala Faatatau Faaopoopo o le Tupe 2018/2019 e pei ona i lumamea nei. E i ai le talitonuga, ua tatau ma onomea ma ua manino lelei le finagalo autu o le Afioga i le Minisita ma le Matagaluega mo galuega maeaea e faatatau i lenei Tala Faatatau Faaopoopo Muamua ae tainane le finagalo o le Afioga i le Palemia, le Kapeneta ma le Malo. I lenei finagalo ua matau atu e lenei sui usufono, o le faamautuina lea o le siitia o totogi mo le afaigaluega. E moni e i ai nisi vaega o le Tala Faatatau Faaopoopo, ae pei o le tulaga lea o lo o manino le faataua.

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

O le talitonuga foi o lenei sui usufono, o se tulaga ua leva ona tapenapena i ai le Malo. E le faapea o se finagalo faatoa tulai mai, ma e lagona lava le faafiafiaina foi o lenei foi sui usufono, ma e pei ona i ai le faafetai lea i le Afioga i le Minisita ma le Matagaluega, ae ave atu foi le faafetai i le Minisita mo Tupe Maua ma lana Matagaluega, aua e moni lava o le tele foi o nei faasoasoa e mafai ona faatino ai galuega o lo o taumafai i ai le Matagaluega.

Lau Afioga i le Fofoga Fetalai, o le manatu lava o lenei sui usufono ma le matau o se faatatau lava ua leva ona fuafua ma tapenapena. Ma i lau foi matau, ua ala ona faigofie ona talia foi i finagalo o lenei Itu, e moni lava o lo o faafogafoga mai le Afioga i le Minisita e faapena foliga fesousouai o finagalo foi e pei ona faaalua, ae pei ua mautu lava ma faigofie ona o se tulaga ua lava tapena. Ma o le faafetai tele lea a lenei itumalo mo lenei faamoemoe taua.

Lau Afioga i le Fofoga Fetalai, ae le i avatua se manatu faaii i lenei Tala Faatatau Faaopoopo Muamua, e avea lenei avanoa e avatu ai se faafetai ma se faamalo i atinae o lo o taumafai pea e le Malo ma paaga e faatino ma fesoasoani ai i si o matou itumalo. O nisi nei o atinae lau Afioga, o ni atinae lava ua leva ona talosaga ai i taimi ua tuanai, ae i ai ma nai atinae o taumafai atu ai nei mo ia fesoasoani, aua lava le taumafai mo le sologa manuia o le soifua manuia o tagata, e le gata i si ou itumalo a o le atunuu atoa.

Lau Afioga i le Fofoga Fetalai, e momoli atu le faafetai ma le faamalo i le Afioga i le Minisita mo Galuega ma le Pulega o le Vai. Ma e molimau atu, o lea ua faasolosolo lava ina maea lelei le faatinoina o le eliina o le vaitaumafa i Sataua. Ma e maua lava i le agaga fiafia ona o le suavai ua maua suavai magalo, ma o le tulaga foi o lo o i ai e tele tele lea faatanoa ua mauaina i Sataua. O le faamoemoe lava lena o lo o i ai, e faaogaina e nai nuu o si o matou itumalo aemaise foi o nuu o lo o lata atu, ae le gata foi i lea o le faaogaina foi e nisi o Ofisa po o Matagaluega a le Malo o lo o i si o matou motu. Talosia ia ua lata mai le taimi e faauma ai lea galuega, faatinoina ai loa ma tatala ma faaogaina e nai o tatou tagata.

Lau Afioga i le Fofoga Fetalai, e faapea foi ona avatu le faafetai i le Afioga i le Minisita mo Galuega, Felauaiga ma Atinae Tetele, o lea ua faamanuiaina la matou talosaga mo le toe faaleleia o le auala o si o matou nuu i Fagasa, ma ua amatalia nei lea galuega, na amata faatino mai i le faaiuga o le tausaga. O lea foi ua faagasolo mai i lenei tausaga fou. Ma e manaomia lava le faatinoina ia lelei ma mautu ona o le auala lea o lo o nonofo ai le toatele o aiga o si o matou nuu. E le gata i lea o le auala lea o lo o i ai se tasi o falesa o le ekalesia Mamona. E tatalo atu ai, e faatino lelei a tatou galuega ia mautu lelei ina ia umi foi se taimi o faaogaina, e pei o le faafetai lena i lau Afioga i le Minisita. Ae e toe tatalo atu pea i se tulaga faamanatu ona o lo o i ai lava ia nai isi foi talosaga mo nisi auala o isi o matou nuu o le matou itumalo, e taulogologo atu pea i lou finagalo, ina ia mafai ona faatino.

Lau Afioga i le Fofoga Fetalai, e avea foi lenei avanoa e faafetai ai i le Afioga i le Minisita ma le Faalapotopotoga o le Malosi Faaletise. Ua tele lava nai faatinoga foi nai talosaga lava ia mo moli auala, leaga e pei o le tulaga foi ia o nai o matou nuu, e moni lava e i ai le auala a le Malo main road, ae tele naunau e afifio foi ma alala i le agai i tua.

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

O la ua manaia lava, ae pei o lea lava e faaauau lava le talosaga atu pea i le aufaigaluega, aua le taumafai ia maua nisi moli, o la foi e talosaga lava i nofoaga ia e i ai falesa, e i ai foi ma isi a matou atinae laiti, si a matou tamaif e taua lava e matou o le tamai uafu ae e le o se uafu, e faaaoga e le aufaifaiva, e moomia tele lava le i ai o moli mo galuega ia. Atonu lava e mafai e lenei avanoa ona faaleo atu ai le talosaga i le Matagaluega lea o le MNRE, i le tulaga lea ia latou moli solar lights. Ae o le faafetai lena ona o ia tulaga e ese le aoga ia i matou, e faigofie ai ma saogalemu le feoai ma le femalagaiga i po.

Lau Afioga i le Fofoga Fetalai, e avea foi lenei avanoa e faafetai atu ai i le Minisita mo le Soifua Maloloina ma le Matagaluega. E mautinoa lava o lo o i ai fuafuaga faataatitia a le Malo, e pei ona i ai le agai i luma o auunaga ma ua i ai foi le talitonuga, e le o toe mamao ona oo lea i ai o le faatinoga. Ae faamanatu atu pea, ia faatau lava le i ai lava o le fomai mo falemai ia i tua. E moni lava i le tulaga lea e maua le avanoa o fomai e faatasi i le vaiaso, ae e le tau fai atu se faamatalaga i le soifua o le tagata. A mai i le Aso Gafua, ua mai i le Aso Gafua ae le faatalitali sei susu atu le fomai i le Aso Faraile, e pei o tulaga na. Ae faafetai lava mo ia fuafuaga o lo o i ai. O le tulaga foi lea i le siitia o tomai faatausi soifua, e ave atu foi le faafetai i lena tulaga, ou te molimau atu ona o tulaga e pei ona i ai falemai i tua, ua uma aso ia e talanoa foi lea, ae leai o la ua talanoa i le tausii soifua ua i ai le tusipasi mautu lelei, fuafuaga lava ma tulaga i aoaoga e pei ona i ai le tatou Iunivesite e pei e toatele ai tamaiti ia, tamalii foi ma tamaitai lea ua faauuina i tulaga ia. Faamalo faafetai i ia tulaga taua ma le aoga mo i tatou.

FOFOGA FETALAI: Toe lua minute o le sui usufono.

Afioga TAPULESATELE MAUTENI TAMASONE METULI II ESERA: E toe lava o si mea laititi lea lau Afioga. E faafetaia foi le fuafuaga e pei ona maua atu le finagalo foi o le Minisita ma le Matagaluega, saunoa foi e o lo o taitaia le tulaga lea o le falemai i tua, lea e fai ma falemai tutotonu i le motu i Savaii. E matau lava o lena ua i ai le finagalo e faaoga Sataua, ma e ioe atu ma faafetai atu i lena tulaga. E lelei le tulaga o Sataua la e ogatotonu mai ia i le la pito ae ogatotonu atu Tuasivi i lea pito. E talafeagai lelei lava le tulaga lea mo fuafuaga ia, e faafetai atu ai i lau Afioga i le Minisita. Lau Afioga i le Fofoga Fetalai, toe o si mea mulimuli lea e ave atu le faafetai tele i le Afioga i le Minisita o le Matagaluega o Aoga. Faafetai lava i faaiuga o suega a nai a tatou fanau e pei ona i ai i lenei tausaga. E moni lava ua tele lava le feeseeseai foi i faamatalaga, ae e leai o lea foi ua manino i le saunoaga a le Ofisa Sili o Pulega e lagolago i lau Afioga, e leai o lena e mautu lelei lava. E faafetai atu ai i galuega lelei, o le lumanai lava lea o tatou o a tatou fanau. O le faafetai lona lua i lau Afioga i le Minisita, i lou lagolago malosi ma lau Ofisa Sili o Pulega ma la outou Matagaluega, sa faailoa muamua foi le tulaga lea i le faleaoga o si o matou nuu i Papa, talosia ia le taputapu ai a si o matou nuu, o lea ua i ai le tulaga lea, toe o se aga ona iloa lea o le taunuuga o le faamoemoe.

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

O lea lava ou te tulai atu ma le ava, o lea ou te fiafia, aua o lea e i ai lau lagolago ma lau Matagaluega faafetai lava. O tulaga lava ia tatou te fesoasoani ai aua le aoaoina ma le aotauina o a tatou fanau. Ona faapea lea lau Afioga i le Fofoga Fetalai, e lagolagoina ai e lenei sui usufono le Tala Faatatau Faaopoopo o le Tupe 2018/2019, ma e toe faafetaia ai lava le galuega maeaea a le Afioga i le Minisita, le Pulega ma le aufaigaluega, ae tainane lagolago, faapea faamanuiaga a le Palemia ma le Kapeneta ma lo tatou Malo. Ia manuia tele.

FOFOGA FETALAI: Malo, faafetai saunao i le sui usufono mo Vaisigano Nu 2. O le avanoa foi lenei, e matau atu o lo o tapena mai se tasi o sui usufono mo Falealili, pe sao ea lea o lau matau atu. Saunao ia lau Afioga i le Gafatasi.

Afioga FUIMAONO TEO SAMUEL TEO (Falealili i Sasae): E manatu o lea ua tatou fesilafai ua i alo, aua foi le tautega ma le faasiligamalos i lea ua tali le sua i lau Afioga i le Palemia, tainane foi o le aiga Kapeneta lau Afioga i le Fofoga Fetalai, aemaise foi o se faasiligamalos i sui usufono uma o le Palemene i lenei taeao na liugalua. E manatu o lea ua uma ona paniniu ma ua uma ona paepae ulufanua paia o lenei taeao e pei ona fofogaina, e fai ai ma sui le sui Fofoga Fetalai, e ave la tatou faasagi ae talifuaitau foi se faafetai na molia e lau Afioga i le Fofoga Fetalai. Ona ou manatu lea e le toe ta i tua le tili pe lolou le lauti fatualalo, aua o Samoa o le ia e ivi lasi, e le toe autalaina faaia a tamavalevale pe tau tapueina foi faapuou e le ola, ae manatu e tulai lou sui usufono e fai sina sao e lipoti le tulaga o le Tala Faaopoopo Faatatau Faaopoopo o le Tupe 2018/2019. E le mafai lava ona faagalo o lea faatoa feiloai le Palemene, o nisi foi o sui usufono e le i feiloai talu mai le tausaga fou. O le mea lea, manuia tele le tausaga fou i lena itu o le Maota lau Afioga i le Palemia, le sui Palemia aemaise o le aiga Kapeneta, sui Minisita faapea foi lenei itu o lo o agaia lo tatou Malo.

Ae le i alu loa le faamatalaga lau Afioga i le Fofoga Fetalai, e muamua ona ave atu se leo ona o se tasi foi o pou o lenei maota, o le Fonousu a Samoa ua faaia aua foi le valaau Paia a le Atua, o se tasi o lenei Komiti sa fai ma siliaga foi o le Komiti i ana tonu fai aemaise o fautuaga i Tulafono e tuuina mai e iloilo. Sa faataua e lenei Komiti lana tofa ma lana faautaga, sa fai ma sao i le faufauina ma le suisuiina o le ula o lenei Komiti o Tulafono Tumau. E leai se fai loto, ua na o le Atua e faia le fikasa. E taia puluivao ae faatafea pulu i vai, e taia le pula e faa le moto aua e le o so outou finagalo po o se tofa i le Palemene, ua fai le finagalo o le Atua. O lea mea la lea, le faletua po o le tausaga ia Ana ma le nofo a alo, faamaise le Agaga o le Atua aemaise i latou o lo o tagi mai ala, ona o le valaau Paia.

Oo mai lea o lau faamatalaga lau Afioga i le Fofoga Fetalai, e momoli lau faamalo i lau Afioga i le Minisita o Tupe i le Tala Faatatau Faaopoopo, o le sui usufono mo Falealili i Sasae e le auese le lagona i le lagolagoina o le Tala Faatatau Faaopoopo o le Tupe ua tuuina mai i le Laulau a Fono. Ae na o ni nai fautuaga ae lagolagoina e lou nei sui usufono e fai ma sui o le itumalo, le lagolagoina o le Tala Faatatau Faaopoopo o le Tupe e pei ona lumamea.

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

E matauina e lou sui usufono e pei e foliga o le tele o le seleni, o lea ua alu i totonu o nisi o Matagaluega o le faaopoopoga o totogi e pei ona aumai. E pau lava lena o le fesili ao lea ua tau manino e pei ona faailoa e le Palemia, sa ou tau fesiligia pe o le a le mea na le faatali laititi ai, sei aumai i le Tala o le Tupe e le o toe mamao, ae peitai e le o se tulaga faanatinati, ae o se tulaga lelei tele foi lea, pe afai ua i ai le fuafuaga a i latou o e sa taulimaina lenei matafaioi. O au le isi sui usufono e lagalaga totogi. Masalo e le na ma le laina le tele o taimi e uunai atu pea ma tuualalo ina ia fai le siitaga o totogi aemaise lava le level pito i lalo o lo o vae ma lima i ai galuega fai a le Malo. Ae malo faafetai i le tofa ua ae.

O le lona lua lau Afioga i le Minisita, masalo o nisi lagona o le a oo atu i le taumafaiga o mea taitasi, ae o le lagona e faapopole ai lou nei sui usufono, o le tulaga lea ou te le ma iloa i ai i le Soifua Maloloina lau Afioga i le Minisita, po o i ai se komiti po o i latou e nafa ma le quality controls o oloa e aumai. E mafua se lagona ona e pei e foliga mai, o vaega nei a fua i faalavelave faa-Samoa i maliu ma faanofonofa ma faafotutupu o faaipoipoga, e felauai lava oloa nei o pusaapa, o pusa pisupo. Na i ai le faalavelave na ou auai e le mamao atu, e fou mai tua o le pusapepa, a o totonu ua leva ona expire apa eleni la e i ai. O le popolega leaga o lea ua mafai ona uma le faalavelave ona o lea o matai foi nei faatau i le faleoloa aumai le tupe. I le va la lea o fefaatauaiga, ona alu ai lava lea o le process lea e le iloa po o le a le umi, a o oloa lava nei o lea e i totonu o le pusa lenei, aua e leai lava ma se isi o anoano se i vagana ua tatala atu le apa se i tulou ua faaletonu ona iloa lea ua faaletonu le tatou oloa. E matauina foi ma le totoa, o le tele o nai isi oloa laiti e i ai pepa susu ma nisi oloa laiti, o la ua oo i le masina e expire ai toe tolu aso ae o la lava e i luga o fata o faleoloa. Ona i ai lea o lou lagona foi lele, maumau pe ana faapea o i ai se tatou vaega faapea, ina ia alu pea le asiasiga faifaipea ina ia control ai oloa i luga o fata o faleoloa, aemaise foi o le fofoga taumafa o le atunuu ina ia soifua maloloina lelei. Ia tasi lena fautuaga.

E le toe oo atu se fautuaga i lau Afioga i le Minisita o Galuega, o lo o matou faia pea le faiva foi lea o le feepo, na o le patitaoto lava ma faatalitali mai, faafetai o lea ua maua o lea ua maua le konekarate e na te faatinoina lo matou auala. Afai foi e le i oo i le process lea, ia faafetai o lea ua faafofoga mai ua maua le konekarate. O le mea sili ma faafetai ua lavea lenei itumalo i le faataunuaina o le auala, ae i ai le lagona o lo o i ai mea e faamuamua, ona o lea e tu le loma mo le tatou taligamalo i taaloga a le Pasefika, pei o le mea lea o lea e ave i ai lau faamuamua. O le ala lena e pei ona ou fai atu o le a le toe oo atu se talosaga. O le a matou tatolo lava ma matou tapuaia ou faiva ina ia taulu taulu lou finagalo e fai se auala o lenei itumalo.

Ona oo atu lea o se faamatalaga i le Matagaluega o le Siosiomaga. Malo faafetai mo galuega, e manatu lava foi lea i le faasalalauina o tatou lisi, o le toatele lava e le ma iloa, e toe tetei ifo se aiga ua uma ona fua se fanua e aia i ai, ua uma ona resitala, pe le mafai ona i ai se isi auala e faailoa ai i le mamalu o le atunuu vaega ia i totonu o lo o lisiina mo le faiga o falesa aemaise foi nisi vaega o le faiga o pisinisi.

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

O nisi vaega o le tuualalo, ia, lau Afioga i le Minisita mo le Soifua Maloloina, faamalo mo le galuega, e le faigofie, aua o i o lo o tutotonu ai, o le ola ma le oti o lo o i ou aao. A o le tuualalo, i nai o tatou falemai foi nei e i tua ona o lea e maua pei foi ona avatu i nisi o saunoaga, pe tasi i le vaiaso ona oo atu le tatou fomai foi lea e vaaia tatou falemai ia i tua. O le popolega, o le vaiaso na tuana'i atu nei sa ou aumaia ai se tina e tili mai i Poutasi, a o le vaega na matauina, pei e foliga o si tamaitai sa tiute i le taimi lea, e avatu loe faatonuga i le mea e fai mai le tatou Ofisa autu ia ona tau atu lea o le togafiti e tatau ona fai po o le a le tui e tatau ona fai a o lo o alu pea le mai. E oo lava foi i le taugologolo mai pe mafai ona vave atu le taavale foi lea ambulance a tatou, ae tau mai le process e alu i ai, o lona uiga a soo uma tagata ia e toatolu i le process lea, lona uiga e oo atu le tatou taavale lea ua maliu le mai. O le ala lea na toe faatietie ai i le taavale ma kili mai i le emergency. Pe leai se isi faiga e mafai ai ona faigofie ona access o tatou tagata ma faafaigofie foi le galuega a i latou o lo o tausimai i tua i tatou falemai nei ina ia mafai ai ona faavavevave vaega ia.

Ia masalo na pau ia o nai vaega e tuualalo atu ai lau Afioga i le Fofoga Fetalai. Ia alofagia e le Atua le soifua maloloina o lau Afioga, ia faafoisia lou malosi aua le faatautaiga o le tatou Fono. Ia alofagia e le Atua lau Afioga i le Palemia, aemaise o le Sui Taitai o lona Itu o le Maota i le nofo a Kapeneta, ia ola foi lenei Itu o lo o agaia le tatou Malo, ia soifua ma manuia le Fonousu a Samoa.

FOFOGA FETALAI: Malo faafetai saunoa i le sui usufono mo Falealili Sisifo. Ma ua avanoa foi le Palemene mo se isi sui usufono e fia saunoa. Tulai mai se sui usufono e saunoa. E manaia lava le soosootauau o sui usufono mo Falealili. Le Sui usufono mo Falealili Sisifo, o lea ua maea le sui usufono mo Falealili Sasae.

Ia tulai mai lau Fetalai Aumua.

Tofa AUMUA ISAIA LAMEKO: Lau Afioga i le Fofoga Fetalai ma le mamalu o lenei Palemene, ou te talitonu o lea ua faalava le alafua e si ou uso mai Falealili Sasae. O le a le oo foi sau faamatalaga i paia ma mamalu o lenei taeao.

E muamua ona momoli atu le agaga faafetai i lau Afioga i le Minisita o Tupe e tusa ai ma le Tala Faatatau Faaopoopo o le Tupe mo lenei tausaga e fesoasoani ai i galuega fai a si o tatou Malo. E le gata i lea, o le a fesoasoani foi i tatou taligamalo e tolu pei ua uma ona faailoa e le Afioga i le Palemia. Lau Afioga i le Fofoga Fetalai, na o nai vaega lava e fia oo i ai sau faamatalaga i nisi o mea e fia faaleleia o si o matou itumalo.

O le Matagaluega o Faatoaga, faamolemole lava i le vaega lea o le SROS pe leai se vaega e mafai ai ona toe fai se suesuega e mafai ai ona toe faaolaina se tasi o mataiai a si o tatou nuu o le taamu niukini ua faapena ona le maua le fualama i le taimi lenei ma ua faigata foi ona toe totoina e tagata aua le mataiai a si o tatou atunuu.

22 IANUARI 2019

**Tulafono Tau Faaofi o le Faatatauina o Tupe Faaopopo (Nu.1)
2018/2019 – felafolafaiga i luga o le faitauga faalua**

O le Vaega o Faigafaiva, e tatalo atu ma le faaaloalo tele, o le pole fagota lea o lo o i gatai o Poutasi, ua faalua ona togi e le opeopea le pole ma ua maumau ai meatotino a le Malo ona magoto atu i le moana sausau. Pe mafai ona toe silasila i ai. E le o mafai ona faaaogaina i le taimi lenei e nisi o lo o i ai o latou vaafagota o si o matou itumalo.

I le Vaega o Fesootaiga, na o sina tatalo lava. Talu ai nei lava sa ma malaga ai ma se tasi o fonotaga sa faia i Take. O le mea e lelei ai, e alu atu lava iinei le telefoni i le sim card a le Digicel e ola atu ai iinei, e tau lava i Take o la e ola le sim card. Ae paga lea, o le matou o Falealili i le talafatai, e le ola ai le tatou sim card lea a le Digicel. Se i toe silasila totoa i ai pe faapefea ona faaola pe le tatau ona faatu se isi pou i luga o le sami ia faapena ona faaoga ai le vaega lea o le tatou telefoni feaveai.

I le Matagaluega o Tupe, e tatalo atu i le vaega a le STEC aua e mautinoa o lo o latou faafaiileina nisi o koko ma popo, pe le mafai ona faasoa mai ina ia faapena ona toto e faaauau ai le tatou atinae o le koko ma le popo.

I le Matagaluega o le Soifua Maloloina, ia lau Afioga i le Minisita, o lena oo i ai se tasi o matou sui, ae talosaga mo le lumanai, a tele ni tatou fomai, avatu ni fafine fomai e fai ni a latou konekarate ina ia mafai ona faigaluega tumau, ina ia faaitiitia ai le omai uma o tagata i Apia ma faaitiitia ai le tupe faaalu mo tagata taitoatasi.

I le Vaega o le Siosiomaga, atonu o le fua tualuga i le fonotaga lea sa faia talu ai nei i Polani, o le fesuaiga o le tau. Atonu o le tausaga ua tuanai sa faapena ona i ai se tasi o poloketi a le Malo i le totoina lea o laau e miliona. O le talosaga ma le tualalo, faamolemole se i avatu lava ni laau se tele se i toto i si o matou itumalo. O le matou itumalo la e i ai punavai, e manaomia laau ia ina ia toto ina ia faapena ona fesoasoani ai i le tatou tau ina ia faapena ona maua le suavai taumafa mo tatou tagata.

O le Matagaluega o Galuega i lau Afioga i le Minisita, avea ia lenei avanoa e momoli atu ai le faafetai tele. O lea ua vaavaai ma silasila o lea ua faagasolo fuafuaga o le tatou tuufofo mo le faiga o le auala lea sa talosaga atu ai i le Aoga Tulaga Lua i Saleilua ma Poutasi. Atonu e i ai se taimi faaauau le galuega, e momoli atu ai le agaga faafetai. O nisi auala e pei lava ona taua, ia ave le faamuamua a le tatou Malo i a tatou taligamalo, ae o lo o fai lava le galuega o le tatalo, tui mai le mulipapaga aua foi lau Afioga ma le feagai ai ma le faasoaina o tatou vaegatupe mo tatou auala galue.

O le Vaega o le Suavai, e tatalo atu ai i lau Afioga i le Minisita ma le Pulega, se i tagai ane lava o lea ua agai i uta i tatou auala galue nisi o afioaga taitasi e faaoga le tulaga lea e ese mai le vaega o le talafatai o si o matou itumalo e aoga e agai atu i le vaega i uta, e manaomia le suavai, e manaomia foi le tatou eletise ia faapena ona faaoga e o tatou tagata.

O le isi vaega e tatalo atu ai i le Pulega o Felauaiga i le Laualeele, o mea foi nei o auala ia e felavasai i totonu o le aualatele e tasi, e i ai le auala lea e alu agai i uta ma tai i le auala lea i Leulumoega, e leai se faailoilo i itu na e lua e omai taavale na e lua tutu o le main road lea e alu ai.

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

E faapena foi la i le auala lea i Falealili i le nuu lenei o Sapunaoa, e i ai le auala e sau mai tai ma le auala e alu agai i uta, ae i le magafa la lea, e leai se faailoilo e iloa ai e taavale, po o fea le taavale e tu, ae o lo o faaaoga lava le commonsense, o le taavale lea e sau i totonu, o le taavale lena e tatau ona tu.

O le isi vaega o le tatou auala lea o le two lane, pe mafai ona i ai ni tatou faailoilo e faailoa atu ia i latou o lo o avetaavale po o le a le saosasaoa o le outside lane a o le a le saosasaoa o le inside lane, aua e poloka atoa i le o o taavale lemu i le ogatotonu, ae o taavale saosasaoa i fafo. Na o sina tuualalo se i fai ai le vaega lea o le....

Ona oo mai lea o sau faamatalaga lau Afioga i le Auaunaga Faa-Soifua Maloloina, avea lenei avanoa e momoli atu ai le agaga o le faafetai i lau Afioga i le Minisita faapea foi le auaunaga lea i a latou galuega e fai, e le faigofie, e fitu aso o le vaiaso, ae 24 itula i le aso e tasi mo galuega fai sifi.

Ona oo mai lea o sau faamatalaga i le Lipoti a le Komiti, o le talosaga ma le tuualalo a le Komiti, silasila i le itulau 41 o le Lipoti, lea ua taua ai le Tulafono o Leipa ma Galuega 1972. O le taimi nei, ua faaleaogaina le Tulafono lea, a o lea o lo o taua i totonu o le Lipoti le vaega lea o le Tulafono. O le Tulafono o lo o faaaogaina i le taimi nei, o le Tulafono o Leipa ma Galuega 2013. Ia, atonu o se tasi o mataupu o lo o faapena ona aliai mai pea i taimi uma, o le mataupu faatatau i le totogi mauualalo, minimum wage. Ia, o le tuualalo, aua i le tatou vaega o le aufaipisinisi i tua le private sector, o lo o talafeagai lava le \$2.30 i le taimi nei pe a fuafua i isi tausaga ua tuana'i o lea sa \$2.00 i le itula. O le taimi nei i le \$2.30, o le Tulafono lava ia o Leipa ma Galuega 2013, o lo o agavaa ai i totonu le tulaga lea o le probation o le tagata faigaluega, none skill. O lona uiga o le tagata lea e alu atu e faigaluega a leai sona tomai e amata i le \$2.30. A maea le tolu masina o le nofo vaavaaia po o le probation period, ia ona pule lea o le ona le galuega e tuu i luga i le \$2.50 po o le \$3.00 e fua i luga o le agavaa o le tagata ua i ai. Ae pei o le totogi lea o lo o faatulaga i le taimi nei, i lo matou talitonuga i tua i le aufaipisinisi ma i latou o lo o fai a latou pisinisi ma le aufaifaatoaga o lo o totogi faaitula, o lo o talafeagai lava le \$2.30 i le taimi nei.

Ia o le a faaiu se matou leo....

Afioga Hon Lautafi Fio Selafi Purcell (Minisita mo Pisinisi, Alamanuia ma Leipa): Lau Afioga i le Fofoga Fetalai....

FOFOGA FETALAI: Malie le sui usufono mo Falealili se i...

Tofa AUMUA ISAIA LAMEKO: Maea le 3 masina o le nofo vaavaaia po o le probation period, ia ona pule lea o le e ona le galuega, e tuu i luga i le \$2.50 pe tuu i le \$3.00 e fua i le agavaa o le tagata ua i ai. Ae e pei o le totogi o lo o i faatulaga ai i le taimi nei, ia o le matou talitonuga i tua i le aufaipisinisi ma i latou o lo o fai a latou pisinisi ma le aufaifaatoaga o lo o totogi faaitula, o lo o talafeagai lava le \$2.30 i le taimi nei. Ia e fai sina o matou leo...

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

Afioga Hon Lautafi Fio Selafi Purcell: Lau Afioga i le Fofoga Fetalai...

FOFOGA FETALAI: Malie le sui usufono o Falealili Sisifo, se i tulai mai le faauilavea o le Minisita o Pisinisi ma Alamanuia.

Afioga Hon Lautafi Fio Selafi Purcell: Faafetai mo le avanoa, ua ou tulai atu e leai se manatu e faauilavea i le lauga matagofie a le sui usufono mamalu. Ae ua matauina ua toatolu sui usufono ua latou laga pea le mataupu leni o le minimum wage, ia ma ou te manatu lea na ona faailoa atu ia fuafuaga o lo o i ai e uiga i le tulaga lea, ia se meamanu e le i tulai mai foi nisi sui usufono mamalu ma faailoa mai pea ia o latou manatu. E sili ona tuu atu o se tulaga o i ai, ona nofo malamalama ai lea. Ia e sao lele lava le saunoaga a le sui usufono mai Falealili Sisifo, ia e faapena foi isi sui usufono e uiga i le toe tilotilo i la tatou minimum wage o lo o i ai pei ua avea le mataupu leni e pei o se Pet subject i leni taimi.

O lo o i ai fuafuaga a le Malo e ui atu i le Matagaluega o Leipa e toe liuliu atoa ai lava le tatou Tulafono tuai lea o le LERA, po o le Labour Employment Relation Act lea e saunoa i ai le sui usufono. O le vaega lea e aafia ai le vaega tonu lava lea e toe iloilo ai tatou totogi maualalo po o le totogi maualalo lava lea. Ia ae pei foi ona fetalai le sui usufono, ia ae pule lava le tagata ia na ona faigaluega i le mea e tuu ai, ae o le maualalo lava o lea e set atu e le tatou Malo ia aua ne i i ai se isi e i lalo ifo. O lea la o lo o i ai le fuafuaga o lea ua aumai foi ni tagata faapitoa e o mai e fesoasoani i le Matagaluega e liuliu atoa lava le Tulafono leni. O le vaega la lea o le minimum wage o se tasi lena o vaega taua o le a liuliu i lalo o le Tulafono leni e review nisi foi o le vaega o le Tulafono lea. E manaomia lava le tele o le consultation, ae o le tapenaga lena o lo o i ai a le Matagaluega nei, e matua fai lava le faatalanoaga. E le faapea foi e na o le Private Sectors, e le faapea e na o le aufaipisinisi, ia o le lautele lava o tagata o le atunuu o lo o aafia uma lava i lalo o le mea leni o le laititi o totogi o le minimum wage lea e i ai nei.

Ia o le faamalamalama lena lau Afioga e faamalamalama atu ai i nisi o sui usufono mamalu o lo o fia tulai, o lo o ua agai atu nei la tatou Matagaluega i le itu tonu lava lea, ona aumai foi lea o le fautuaga i le Kapeneta e uiga i le tulaga ua tatau ona i ai pe sii i luga po o le a le tulaga e tatau ona i ai, a ua i ai le fuafuaga a le Malo i le tulaga lea, ma le faaaloalo lava.

FOFOGA FETALAI: Ia ai ua manino le faafofoga mai o le sui usufono o Falealili i Sisifo, tulai mai le sui usufono.

Tofa AUMUA ISAIA LAMEKO: Lau Afioga i le Fofoga Fetalai ma le mamalu o le Maota, faafetai atu i le Afioga i le Minisita mo le faamalamalama. Ia e le auese lava se finagalo o le auauna, faatai la ma so matou leo, ia *Le Paia Ia Alalagafa ma Lalonofo o Tulafale ma Tauagaeseese o Falealili*, faamalo le tapuai, ia faamalo tatalo, ua iu manuia ai taumafai a ou alo e toalua, e o lo o taumafai i upufai a Samoa.

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

Lau Afioga i le Palemia ma lena itu o le Maota, ia agalelei le Atua i lena itu, ia faapea foi lo matou itu nei. Lau Afioga i le Fofoga Fetalai, ia ua faaiu atu ai ma se faamatalaga, agalelei le Atua, avatu lou soifua ia aua le tautuaina o le tatou atunuu ma si o tatou Malo, faafetai.

FOFOGA FETALAI: Malo, faafetai...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai se i....

FOFOGA FETALAI: Ia tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Toe fia faaopoopo atu lava i si mea sia leaga e taua tele. Leaga ua toatele ia... feololo lauga ia na agai mai ai lea foi ua uma na faamalamalama e le Afioga i le Minisita, ae i ai lava si au faaopoopo lea, pe a tatou manatua na oo tatou popo na ave i fafo i le 30,000 tone i le tausaga ia le popo, na lau i fafo ia ma le koko.

O Samoa o le tasi o le 14 atunuu o le lalolagi sa alu atu ai le high flavour cocoa sa faaaoga e fai ai mea ia o sukalati, ia ma e tele le tatou koko na alu i Hamburg Siamani ma alu foi i Peretania lea sa i ai falekoko tetele lava ia na i ai. Ae ina ua amata ona tatou agai e apo ia Tulafono ia faa-ILO, ou te manatua le taimi na alu ai le isi Minisita e fono i fono ia. Foi mai loa faasalalau *ō le mea lea e tatau ona mulimuli ai Samoa, faatulaga loa mea ia tau o togoti tatou o faatasi ma fafo*".

Ia ae manatua foi o le koko e fotu mai loa se fuata i lena taimi, ae pau mai loa le timu oti atoa. A tolu la ia fuata koko e fotu mai i le tausaga ae fetai ma le timu, oki atoa lava ia le koko, ae te i loa ua faatulaga loa Tulafono i le taimi lena lea ou te tau to manatu po o le 1976, amata mai loa ona tapuni, tapuni, tapuni atu ae gau lea faatoaga koko tele, gau lea faatoaga koko tele, gau lea faatoaga koko tele, aua foi ua le mafai ona faaauau le mea lea o le ola i Tulafono mai fafo lea ua alu ai tatou, ae o aso la sa tele lava le tofa fetalai sa faaaoga, a leai ni tupe, e i ai isi mea e togoti ai e pei o taamu, meaai ma fagaga sa fai i totonu o faatoaga.

O le mea la lena o lea ua tatou alu ai, lea la ua tatou alu ai loa, ua a mai la le mea lea ua i ai? Ia ua leai se koko, tapunipuni uma ma faleoloa sa i nuu i tua, ova ma le 100 faleoloa laiti a kamupani i Apia nei sa i tua ua tapuni uma. Masalo ua le o toe atoa se 100 ni tone o le popo o lo o ave nei i fafo ae o lea e faatulaga o le popo sua, ae ua leai se mea. O le mea lena na oo ai i le 30,000 tone tatou popo na ave i fafo, ma le tele o le koko sa lau i fafo.

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

Ua ala ona ou tau atu ia mea, ona e maaleale tele le mataupu lenei i le vatapuia e tatau ona vasaga lelei totogi o la tatou Malo ma totogi o lo o tauave e le Private Sector latou i tua. O pisinisi nei i tua, e faaletonu atu loa le soona alu atoa o tatou ma le le vaai mamao, ia ona oti loa lea o pisinisi a tagata i tua lea e faalagolago i ai ia lo tatou Malo. E le mama la le mataupu lea e laga mai, e tele ona itu lavelave e tatau ona faaeteete i ai le Matagaluega ma le Malo.

FOFOGA FETALAI: Malo, ia ai ua manino le faafofoga a le Palemene i le faaopoopoga o le faamalamalamaga a le Malo. Ia, avanoa le nofoa i se isi sui usufono e fia saunoa. Ia se i tulai mai le sui usufono o le itumalo malosai mai Safata Sisifo.

Afioga LEAANA RONNIE POSINI (Safata Sisifo): Lau Afioga i le Fofoga Fetalai, e muamua ona faatalofa atu i lau Afioga i le Fofoga Fetalai, faatalofa atu foi i lau Afioga i le Taitai o le Malo, Kapeneta faapea foi Minisita Lagolago.

Ia ae muamua ona faailo le agaga faafetai i lau Afioga i le Minisita o Tupe, i le Tulafono Tau Faaofi o le Faatatauina o Tupe Faaopoopo (Nu.1) 2018/2019 ua tuuina mai i totonu o le laulau o le Palemene. E momoli le agaga faafetai ona o lea ua matau o lea ua folasia le siitaga o totogi o tagata faigaluega e momoli atu ai le agaga faafetai. Sa ou faitau foi i le Tala Faatatauina o le Tupe Faaopoopo (Nu.1) 2018/2019, e lagolagoina e lenei itumalo o Safata i Sisifo.

Ae e i ai nai tuualalo, e faamanatu atu pea i a outou Afioga i Minisita, ia o mea lava e tauologologo ma tau faamanatu atu i a outou Afioga, aua lava le agai i le faaleleiga o nuu o tatou itumalo aemaise ia le tatou Malo. Ia e le toe oo se tala i lau Afioga mo auala, e le gata i auala galue aemaise foi auala o lo o fe-afioai ai le mamalu o le atunuu aemaise lo matou itumalo, amata mai i Saanapu i Sataoa, Lotofaga, Nuusuatia ma Vaiee. Ia e tele lava nai auala na ua taoto atu i lau Afioga i le Minisita, o auala e fe-afioai ai, o lo o taoto atu i lau Afioga.

Ona oo mai lea lau Afioga i le falemai lea aua o Safata sa i ai le falemai faa-itumalo, ae o le taimi lenei ua leva ona taoto le falemai lea e le toe faaogaina. Ia ou te talitonu foi e faamanatu atu i lau Afioga i le Minisita mo le Soifua Maloloina, ia o la ua mautu lava le nofoaga e faatino ai le falemai o le itumalo, lea ua avanoa lea e faatino i Saanapu, ou te talitonu o lea e matau o lea ua aumai le tupe lea i le Faletupe o le Lalolagi, e faatupe ai la tatou falemai. Ou te talitonu foi o lena ua silafia e lau Afioga le falemai faa-itumalo lea o si o matou itumalo.

E le toe oo foi se tala tele i lau Afioga i le Minisita mo Aoga, e na ona faamanatu atu i lau Afioga le tulaga o faiaoga, le tulaga o le le lava o faiaoga, e faamanatu atu pea lea tulaga aemaise lava i Aoga Tulagalua, aua o i o lo o i ai le faavae lea o tatou alo ma fanau, aua a lelei le aoaoina i Aoga Tulagalua, e faigofie foi galuega a faiaoga i luga i Kolisi ma tatou Iunivesite.

Ia o nai moli auala o lo matou itumalo lau Afioga, e manaomia lava nai moli i luga o auala aemaise le pogisa i le po.

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

Ia faapea foi taligalu lau Afioga i le Minisita, lea foi sa oo atu ai foi lo matou nuu i Sataoa ma Saanapu, se i silasila ifo lau Afioga i nai taligalu na ua ova nei ma le 20 tausaga e le i toe faaumaina taligalu lau Afioga. Ia e tatalo atu i lau Afioga se i alofagia taligalu se i faamaea ona faatino.

O le isi mea e matauina lau Afioga ua tatau i lo tatou Malo pe le ua talafeagai ona fai se Fale Tineimu i le itu lea i Saute o Upolu. E silasila foi ia outou Afioga o lea ua tele faletalimalo lea e i ai, amata mai Lefaga, ia faasolosolo mai i Safata, o Siumu o Falealili, ia o lea foi ua tau matau lava i mea ia o mu, e le maalofia e tatou ia faalavelave faafuasei. Ia lea foi na mu le faleaoga a Siumu, ia tuu atu i lo tatou Malo, pe le faia ai i ina le Fale Tineimu.

Ona oo mai lea i a tatou auaunaga lautele, lau Afioga i le Minisita mo Galuega, Felauaiga ma Atinae Tetele, i le Faalapotopotoga lea o le LTA, se faamolemole lava lau Afioga, mo taavale foi ia e fai mo sulu i le po foi lea, o lea pei sa ou faalogo atu i le fonotaga talu ai, e pei o la e faataga foi lea i taavale lea e fai lafumanu, lea la e i ai moli sulu ia. Ia ae o le pona la e pei ua faateteleina i le po le ki o moli sulu ia, e matua sesega lava i le vaai pe a fetau taavale. Ia o lau tatalo i lau Afioga i le Minisita, ia matua faasa moli sulu ia e faasesega mata i luga o le auala, i tulai mai ai ni faalavelave faafuasei lau Afioga.

Afioga Hon Papaliitele Niko Lee Hang: Lau Afioga i le Fofoga Fetalai....

FOFOGA FETALAI: Ia malie le sui usufono se i tulai mai le Minisita o le LTA.

Afioga Hon Papaliitele Niko Lee Hang: E le fia faalavelave le saunoaga matagofie a le sui usufono mamalu ae ona o le mataupu lea e laga nei, e pei e faalogologo atu e pei e faataga e le LTA moli ia. E faasa, o le tulaga lea e i ai, e o atu e pasi taavale, e le ave atua moli i le taimi e pasi ai taavale. Ua uma ona pasi ua avatu i ai le sticker, o loa faapipii moli ia. O le faatonuga lea ua ave i le LTA, a maua se taavale pe fealuai i le ao, sei moli, ae ave e taofia leaga o le Tulafono la e i ai e sa. O le popolega i le aafiaga o le mamalu o le atunuu lea e fe-afioai i le po aemaise le po, segaia ai ia fofoga foi nei ma tulai mai ai se faalavelave. Ua ou tulai atu e faasao le mea lea leaga e le o faatagaina e le LTA ma lou faaloalo lava.

FOFOGA FETALAI: Malo, ia ua faafofoga mai sui usufono mamalu o le Palemene, se matau le numera o le taavale lena ma lipoti mai loa. O le a le mea a le Minisita e fai atu i ai o lea ua... matau le numera ma tau i le Ofisa o Leoleo ma le LTA. Tulai mai le sui usufono e saunoa.

Afioga LEAANA RONNIE POSINI: Ia faafetai tele i lau Afioga i le Minisita, o lea ua manino lea mataupu aua o lea na ou tau matau i le fonotaga talu ai, faapea e faataga taavale ia e i ai a latou lafumanu, ona e faaoga foi ia moli lea e sulu ai, ia ae o lea ua saunoa manino lau Afioga i le Minisita, ia faafetai tele mo le Tulafono lea.

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

O le isi mea lau Afioga i le Minisita i lau matau, ua ou matauina le va lea o le Faletupe o Atinae ma le Faleoloa o le Ofisa o Faatoaga tuai lea ua le toe faaaogaina, o lea ou te vaai e oso mai le taavale i le ituala i tai, e sau agai i totonu lea e i ai le kolosi, ae i ai le poumoli la e tu ai, e tau faaofi lava taavale i le va lena, pe le silasila ifo i ai lau Afioga po o talafeagai le toe faaoso mai o taavale i le va o le Faletupe lea ma le Faleoloa o le Ofisa o Faatoaga e sau mai i le itu lea e i ai le faleia i uta. Pe e le o alagatau ona taofi lena auala taavale e i ai.

FOFOGA FETALAI: Tulai mai le Minisita mo Galuega.

Susuga Hon Papaliitele Niko Lee Hang (Minisita mo Galuega, Felauaiga ma Atinae Eseeese): Lau Afioga ou te le o malamalama i le auala, na pau lava le auala faataga o le va o le RSA ma le Development Bank e oso mai ai taavale mai le maketi o iā e toe oso mai le main road, a o le auala lea e te saunoa i ai ou te le o malamalama i ai. A faapea o le va o le Faleoloa o Faatoaga ma le Development Bank, e le o se auala. O le paka le mea lena, ae le tatau foi ona faaoga e oso mai ai ni taavale. Ma lou faaloalo lava lau Afioga.

FOFOGA FETALAI: Malo. Tulai mai le sui usufono o le Aiga Malosi.

Afioga LEAANA RONNIE POSINI: Faafetai tele i lau Afioga i le Minisita, ae leaga o lea e faataga mai lava taavale ia e ui mai tai i le va lena ona sau lava lea ma agai mai i uta i le tatou auala autu lea. E sao o lea e paka ai taavale, a o le uiga foi lea o lau tala, pe le silasila ane lau Afioga pe le tatau ona faasa lena auala aua toetiiti lava oloia taavale i le poumoli la e i le ituala i tai, ae faaomiomia mai ai i totonu taavale e tolu. Na o se fautuaga e ave atu e silasila i ai lau Afioga.

O le isi mataupu lau Afioga i le Minisita, o tatou taavale ia, faafetai tele o lea ua i ai le fuafuaga lea ua taoto le tausaga faatulagaina o taavale i le tele o tausaga lea e aumai totonu o le tatou atunuu. A o lau lea tatalo lau Afioga, pei o lea e tau matau atu i le Matagaluega, o taavale fai mai ua leva tele taavale ia ua 10, 11, 12 tausaga. E faapea ua leva toe le maua ni parts, totoga foi ia e fai ai, a o lau matau, e le o le faafitauli lea. O le faafitauli lea e tulai mai nei, o le le aumaia e faletaavale o totoga o taavale ia pe afai e faaletonu. Aua e i ai lava isi taavale ia ou te iloa e tai lua, tai tolu tausaga, a o la lava e tutu. Ae ala ona tutu ona ua le aumaia e faletaavale nei totoga foi nei, ae a ta vili atu i Niu Sila, o la e matua tele lava parts i Niu Sila, aemaise lava mea tau pikiapu, aua e talitonu pei o taavale ia e tua tele i ai o tatou aiga, aemaise lava i tulaga o faatoaga ma atinae.

Ona oo mai lea o se faamatalaga lau Afioga i le Minisita mo Aoga, e matau lau Afioga... faafetai tele mo galuega lelei. Na ou matau i le tausaga lea na tea nei, e i ai faaiuga o suega a le tatou Iunivesite, lea na matua vevesi ai foi ma tuuaia le tatou polokalame Foundation lea na i ai.

22 IANUARI 2019

**Tulafono Tau Faaofi o le Faatatauina o Tupe Faaopopo (Nu.1)
2018/2019 – felafolafaiga i luga o le faitauga faalua**

O fautuaga a nai matua na aumai, na avatu le lisi muamua o lo o i ai igoa i le faauuga ae te i ua toe alu atu le isi lisi mulimuli ua leai i le faauuga. O le mea moni lava lau Afioga i le Minisita e faama tagata le mea lea aemaise lava nai matua. Ua iloa foi matua e faauu loa a latou fanau, ua iloa uma e tagata o le nuu ae te i ua toe alu atu le lisi fai mai e le faauu.

Lona lua o le mea lea lau Afioga, e le mautupe uma tagata. Aua ou te talitonu i le aso lena e ta le 8.00 i le po o le a ta foi o le 9:00 o la e tutu matua e toe tau sue se tupe e totogi ai aua pe \$300+ le tupe e totogi e fai ai le faauuga lea. I lou la talitonuga, na omai nai matua nei e moomia ni tupe e totogi ai le faauuga. Ma le isi mea o lea ou te tau matau atu, e le iloa pe le o tau aafia ai ma tatou avanoa sikolasipi foi nei, aua o results nei e vave aumai, ia e aafia ai foi la le faiga o arrangements o fuafuaga a lo tatou Malo i mea ia o avanoa faasikolasipi. Ia se i silasila totoa i ai lau Afioga pe i ai se mafuaaga aua ou te talitonu faatoa tupu a lea o le mea lea, ae tele lona afaina i totonu i le tulaga o tapenaga a matua i le tulaga o faauuga ma mea faapena. Se i silasila totoa ane lau Afioga i le Minisita.

Se i silasila ifo lava lau Afioga i le Minisita mo Aoga i le polokalame lea o Aperenitisi, faamolemole lava lau Afioga po ua uma ona suesue e le SQA aua ua leva le polokalame lea, po ua suesue e le SQA po ua uma ona fai le mea foi lea faapapalagi o le accredit, po ua uma ona fai le accreditation o le polokalame lea. O le polokalame lea o le taua ia, sa ou taua foi i le isi taimi, aua o aoga faaauu a tamaiti aoga, tagata ia ua faigaluega, lea e toe agai mai e toe faaauu o latou agavaa e tau saili, aua o i lea e tua i ai falefaigaluega i e maua le agavaa, aua e ese lava le atamai faa-iunivesite foi lea i le mafaufau, ese foi le agavaa o aperenitisi. E manaomia le agavaa ma galuega faatino. O le mea lena ou te talitonu o lea e moomia e lo tatou Malo i le taimi lena, tatou tilotilo i le tele o galuega faatino ia lelei le faatino o skills e manaomia i totonu o falefaigaluega. Masalo a i ai foi se taimi o le Minisita o le MCIL, se i fai foi se latou sailiiliga i falefaigaluega i le tulaga o agavaa ma skills o tagata faigaluega. Aua ou te talitonu, o le technology e le tumau e suisui lava i taimi uma. O le mea foi lena o lea e tatalo ai i le tatou Iunivesite i le tulaga o aoaoga faa-matata eseese, o le mea lena e tatau ona oo i ai le latou sailiiliga ma upgrade tagata faigaluega ina ia maua skills nei o tagata aemaise faiaoga. E le o manaomia tele le o faiaoga o matata eseese e fai ni Masters ma ni PhDs a o galuega faatino e mafai ona alu i lalo o le sami e uelo lalo o le sami ma mea faapena. O tomai ma agavaa na o lea e manaomia e lo tatou Malo e atinae ai tagata e mafai ona faatino a tatou galuega.

Ona ou oo mai lea i le Afioga i le Minisita mo Faatoaga, e momoli le agaga faafetai tele i le Afioga i le Minisita ona o lea sa ou talosaga i le kamupani nonu. O le taimi lena po ua fa ea kamupani lea ua agai atui i lo matou itumalo, e ui lava ina sau moto ai le nonu, ae faafetai o la e taulia, o la e sau ai lava. Ae faafetai i le Afioga i le Minisita i le tulaga o le nonu lea ua tele atu kamupani i tua i si o matou itumalo, aua tasi lena itumalo e tele ai le tulaga o le tatou nonu lea sa talanoa i ai.

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

Ona ou oo mai lea i le Minisita mo Faamasinoga. Na pau lava lea o si au faafesili lau Afioga, o le mea lea o poloaiga le tumau lea e ave atu e la outou Matagaluega. Aua o lea na tau matau i le aso ananafi, e pei e leai se mea e taofia ai le aia a le isi tagata i le isi tagata e fai ai le mea lea o le poloaiga le tumau. Na pau lava lea o lau fesili i lau Afioga i le Minisita, pe leai se taimi e feteenai ai poloaiga le tumau lea e ave atu, pe i ai se taimi e ono feteenai ai i se mataupu lava lea e tasi, ua faaulu mai e le isi itu le poloaiga le tumau, talosaga foi le isi itu i le poloaiga le tumau, ona feteenai lea o poloaiga le tumau.

Ia, e momoli le agaga faafetai tele i le tatou kamupani lea o le Samoa Shipping Services, o lea ua matau ua tele tatou tamaiti lea e agai i avanoa foi ia a le aoga a le Maritime lea ua agai i fafo ma tele ai nai o tatou aiga ua agai alo ma fanau ua maua ai nai seleni. E momoli ai le faafetai tele i le Pule ma le Pulega mo lea galuega lelei. E faapea foi le tatou Samoa Airways, faafetai tele i lau Afioga i le Minisita, aemaise foi le Pule Sili ma le mamalu o le Pulega, malo lava le onosai. E tele lava faitioga, a o faitioga ia e fatufatu ai tatou kamupani. Pe ana leai foi le kamupani lea, e le alu ifo i lalo pasese o le vaalele lea o le Air New Zealand, ae faafetai o lea ua matau atu lau Afioga o le a toe fai le isi a tatou vaalele. Ia tatou taumafai tatou te malaga uma i le tatou vaalele ia maua ai se polofiti a le tatou vaalele.

Ia, o nai manatu ia lau Afioga i le Fofoga Fetalai, ia manuia tele lau Afioga faapea foi le Palemia ma le mamalu o le Kapeneta, soifua ma ia manuia.

FOFOGA FETALAI: Faafetai. Oi, se e ese le manaia o le saunoaga a le sui usufono. Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o le tele ia o mea anoa ia e maua i saunoaga a sui usufono, o le mea foi lena e fai ma o matou tutulai atu ai ina ia mafai ona maua mai e sui usufono le faataua, ae aua foi le faatali se i oo i le tatou Fono ona molimoli mai lea, molimoli tuusao pea i le feiloaiga masani. Vaai la i le taua o le mea lea o le le tumau. Ia o lea ua faafogafoga uma lava tatou i le mea o le poloaiga le tumau, aua e aafia uma ai lava tatou, e oo foi ia te au ou te le malamalama i ia mea o le le tumau. Na pau lava le mea ou te malamalama i ai, a fai le le tumau, lona uiga e le tumau. E fai loa lava le isi mea, uma ai le le tumau i ina ae amata le isi le tumau. Ia na o poloaiga le tumau ma le tumau ma le tumau e faapena ai lava... Ae lafo i le faamasinoga se i aumai a latou paupau po o le a tonu le sao o ia mea o le le tumau.

O le tulaga taua o le mea lena, ua 36 tausaga talu ona taoto le faavae lea a le HRPP, a i ai loa se mea e fia faasao, faasao. A i ai se mea e tataua ona tutulai atu Minisita e fesoasoani ai i se mataupu tulai atu loa, ona o lena e alu atu loa lava, o aso la i le taimi na faatu ai le faiga faavae lea, e matautia upu sa lafo i totonu e tu mai lava le isi lau le Fofoga Fetalai, -lou mea gaoiø O upu na o la e i totonu o faamaumauga, e matua maoae upu felafolai i lena taimi.

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafoaiga i luga o le faitauga faalua**

O le ala la lena e ala ai ona tutulai atu le Malo e vave faasao aua a tuai atu, nanei alu le talaiga a e o lo o faalogologo mai, ua e faalogo atu o fai mai e gaoi le Minisita o le a, gaoi le Minisita o le a, ae leai lava se tali, leai lava se tali. O le ala lena e tulai atu ai le Malo e faasao loa lava i le taimi lea, leaga o tala e fai vae ae lealea mo le puipuiga o le Malo. O le mea la lena ia onosai foi outou tou te manatu e le onosai le Kapeneta, e tatau lava ona faasao mea e le sao. Ae taua tele le tatou felafolafoaiga, matou te tutulai atu e apoapo vaega ia e faataua, o le ala lea na omai ai Faauluuluga o Matagaluega. Ia silasila i le taua o le isi mea lea? Le mea lea o taavale ia na agai i ai le saunoaga a le sui usufono mai Safata i le auala taavale lea e tatau ona taofi. Ia o lea faatoa faalogo atu i ai le Minisita, a o lea foi faatoa ou faalogo atu i ai, ae sao. E lua a la mea o le aveese o le poumoli po o le fai o le mea lea o le matua taoto lelei o le faaiuga. O le taua o le itu lea, aua e lipoti atu loa i leoleo fai mai leoleo, leaga e leai se Tulafono. O le mea la lea, leoleo, se faaoga le faautaga tatau. A outou silasila atu o le mea e tatau ona fai fai loa, ae tuu lena mea fai mai e leai se Tulafono a o le faaoga o le faautautaga tatau fai le mea tatau, aua le toe tuua e faatali i le isi aso, e oo atu i le isi aso ua tau le solitulafono talu ai le faatali.

Ia o le faamalamalamaga lena mo sui usufono ia e faapea mai, onosai le Kapeneta, e le mafai ona taofia faiga faavae ua 36 tausaga o taoto i totonu o le Maota lenei ina ia faafaigofie ma puupuu ai a tatou Fonotaga, ona o le mea lenei a le vave faasaoa e sau ai foi le isi toe sau ai le isi toe sau ai le isi ia ona umi ai lea o tatou felafolafoaiga.

FOFOGA FETALAI: Malo saunoa. Ua manino auofala i ia vaega. Ua avanoa le Maota mo se isi saunoaga. Ioe, ua maua atu pei o la e fetuunai mai le sui usufono mo Siumu ma le sui usufono mo Aana Alofi Nu.2. E lafo atu pea, e mafai foi ona lafo i lea itu o le Maota, e felafoi.

Tulai mai le sui usufono sinia o lea itu o le Maota, lau Afioga i le sui usufono mo Palauli le Falefa.

Afioga Hon FAUMUINA TIATIA FAAOLATANE LIUGA (Palauli le Falefa): Faafetai i lau Afioga i le Fofoga Fetalai. Ou te iloa e le i mateia lava e se isi o le aualii ia le mea lea o le fai nei le tala, toe fai nanei toe fai taeao, ma e atili tele ai lota taimi. Faafetai mo le avanoa.

Lau Afioga i le Fofoga Fetalai, ua faamalo le faautauga o le tatou Palemene. Faafetai foi i le Afioga i le Palemia, o le Sui Palemia faapea le mamalu o le Kapeneta ma le tapuaiiga, o la e afifio mai Minisita Lagolago, aua ua le mafai lava ona lauga Minisita Lagolago ona o le latou Tala o le Tupe lea ua faatalanoaina nei.

E muamua ona ou faapai atu ma faamaise i le tausī o Paꝰu, o se uo faapelepele ia i tatou uma, aua o le tia lava e le seua o le tao foi e velo i le maninoa le finagalo o lo tatou Matai.

22 IANUARI 2019

**Tulafono Tau Faaofi o le Faatatauina o Tupe Faaopoopo (Nu.1)
2018/2019 – felafolafaiga i luga o le faitauga faalua**

Ou te lagolagoina le Tala o le Tupe, ae e i ai nai motugaafa e tuuina atu foi i le Afioga i le Palemia, ma lo tatou Malo e aoga foi e faufau ai le agai atu i le lumanai. O lea sa e faamanino le tulaga e le mafai ai ona matou taua mea taitasi, ao le aoatetelega o mafaufauga, o le a faapena ona faataatia ai se manatu. Faafetai i le Malo mo atinae, o le tele o atinae e le taugofie, e le faigofie, ao atinae foi e tele ai faitioga. Ae soo se mea lava tatou te faia, e eseese finagalo o tagata. Lau Afioga i le Fofoga Fetalai, o le siitaga o totogi o le aufaigaluega, o se mea ua talafeagai i le taimi nei. Ma o lenei foi siitaga o totogi, o lea lava e fua i tupe maua a lo tatou atunuu. Ou te faafetai ai i le tofa ma le faautaga na faavae ai lenei finagalo, e auauai ai le siitaga a le aufaigaluega i tausaga e lua ma le afa o lumanai nei. Sa taua foi e le Minisita o Alamanuia ma Leipa e faapea foi le Afioga i le Palemia i le tulaga lea i le totogi pito i maualalo. Aua o le taua ia o lenei mataupu ma e tatau foi ona ave i ai le faamuamua a lo tatou Malo, aua o le aafiaga ia o galuega i fafo atu o lo tatou Malo.

O le mea lava lau Afioga i le Fofoga Fetalai faapea le faafofoga a lenei Palemene. O le 80 i le 90% o atinae ia e faatino e le Private Sector e faatupe mai e lo tatou Malo. A silasila lenei Palemene i la tatou Tala o le Tupe, e tusa ma le tai \$400 \$500miliona o atinae ma polokalame e faagaioi ai. O lona uiga, o lea lava e ave atu foi e le Malo ia fesoasoani, ina ia laugatasia ai i latou o e faatino atinae i le tulaga o le Pisinisi Tumaoti. O le ala tatau lea ona tatou silasila lelei ina ia taugofie le faiga o atinae, a ia faapea foi ona amanaia le tagata e maualalo lona tamaoiga. O lea la e matuai fiafia lava lou faamoemoe i lenei aso i le faamalamalamaina o le itu lea sa ou popole i ai. Le loomatua ma le toeaina la e afuafu tetele i tua, e aumai ni mea e faatau, aua o le aufaipisinisi foi lea o le a o atu ma maua ai mea e faatau ia latou faaeleeleaga i nuu i tua. Aua o le aufaigaluega a le Malo toeitiiti lava 10,000, 4500 tagata faigaluega i Ministries, ae 5500 tagata faigaluega Faalapotopotoga Tumaoti. A fua la i le tulaga o le aufaigaluega a le Malo e 10,000. O le aufaigaluega lea e i tua i le Private Sector, ou te iloa e latalata i le 40,000, o lona uiga e limasefulu afe le aofaiga o tagata faigaluega, o lea e manuia i le tulaga lea. Ou te faafetai ai i le tofa ma le faautaga na faataatia ai tala o le Tupe lea ua folasia nei i lumamea, e ui ina laititi. Aua o le siitaga o totogi, e na o le \$8,90000 le tupe e alu ai. Ao le Tala Faaopoopo o le Tupe, e \$19miliona+ o lona uiga o la e i ai ma tupe o atinae ma le faaleleiga ma le aveina o gasegase ua leai ni togafiti e maua iinei, ae ave i Niusila, e faafetai ai i le Malo.

O le isi vaega ou te fia tuualalo ai i lo tatou Malo, le itu lea e mafai foi ona siitia totogi ae leai se tupe e alu ai. E faapefea lena mea? O le fetuunaiga o itula faigaluega o le aufaigaluega. E mafai ona e faia galuega i le fitu itula. A faalaititi la itula faigaluega mai le valu i le fitu, afai la e 10,000 le aufaigaluega a lo tatou Malo, e 10,000 itula faigaluega e faaitiitia i le aso e tasi. O lona uiga, e limasefulu afe itula e faasaoina i le vaiaso e tasi. O lona uiga o lau tala lea, e le mafai ai ona faaoga le eletise aua o le a tapuni le Ofisa 1 hour early. O le a faaitiitia ai foi le faaoga o isi aseta a le Malo.

22 IANUARI 2019

**Tulafono Tau Faaofi o le Faatatauina o Tupe Faaopopo (Nu.1)
2018/2019 – felafolafaiga i luga o le faitauga faalua**

E mafai foi ona e alu ai i le fale e mafuta ma lou toalua ma lau fanau, one hour early. E masani ai foi, aua e masani ai tele louí ou te alu atu loa ou alu toto le fai, ou alu toto lau laau toto sau aute, e faamanatu ai lea aso ma lea aso. O le mea foi lena tou te vaai , ou te le faatau i le maketi, aua foi o la e i ai le togafai e fua. O le pine faamau o lau tala lea e fai atu, ia lava le mafutaga a tatou ma o tatou aiga. Na ou fesiligia le Ofisa o Faamasinoga, ae fai mai toetiiti faselau afe ia cases o faaipoipoga ua tatala. Aisea? Le lava le mafutaga a le tama po o le tina faapea le fanau.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: Lau Afioga i le Fofoga Fetalai

FOFOGA FETALAI: Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: Lau Afioga i le Fofoga Fetalai, e fautuaina le sui usufono e alu i le maketi i aso uma aso uma aso uma, ina ia e silafia ai le tulaga o lo o i ai le atunuu, i le tulaga o taumafa ma le latou faaeleeleaga. Tuu la le amio lena a oe ae fai le mea lea ou te fai atu ai.

FOFOGA FETALAI: Ou te tapa le sui mamalu, talu ai e manino, e manaia le tuu atu o lau tali taeao ae leaga o lea ua tatou toai taunuu i le taimi e manava ai la tatou galuega. Ae tatou te lei tolopo o le a ou faaiuina la tatou Fonotaga i se tatalo.

Na tolopo Taulumaga a le Fono Aoao Faitulafono i le itula e 1:02 i le aoauli seia aulia le itula e 9:00 i le taeao o le Aso Lulu, 23 Ianuari 2019.